

19
IO. ANT. CASSITTI

ICTI ET ADV. NEAPOLITANI

AMOENITATES IVRIS



Ex Madama


NEAPOLI



C1212CCLXXXX.



1848



NOBILISSIMAE MATRONAE
IULIANAE AMUDERSBACH

IOANNES ANTONIUS CASSIUS

IBitis e pluteo, soboles fugitiva, papiri
Corniger immensis qua sonat Ister aquis.

Vos MUDERSBACHIA excipiet, Divina Puella,
Altera quae Pallas, quae mihi quarta Charis,
IULIA, qua Herbipolis felix laetatur alumna,
Inque suis numerat, iure superba, viris.

Germanas, dum scribo, inter pulcherrima Nymphas
Adstat ad AUGUSTAS obsequiosa NURUS:

Aut illam CAROLINA sacri dignatur honore
Colloquii, ac Natae gaudet habere loco.

Non tamen absentis munuscula spernet amici,
Et semel in nostrum lumina flectet opus.

Nuper ubi Hadriacis CAROLINA adparuit undis
BINAQUE cum magno REGIA NUPTA PATRE;

Semifer hinc Triton buccis concham inflat anhelis,
Hinc saltant nudae, turba marina, Deae

Lae-

*Lætifico interea tonitru catapulta remugit ,
 Bombus & ad Libycas murmurat usque sinus.
 Regali conviva sedens tunc IULIA mensa
 Conspicitur, DOMINAE claudere iussa latus.
 Post paullo Illyricis FERNANDO in finibus exis
 Obuius , ac NURIBUS fis, LEOPOLDE, comes.
 Hic tanto in coetu laudatur IULIA: FRATRE
 Laudatam sistit CAESARIS ipsa SOROR.
 Quis putet? Haec inter nostri haud oblita VIRAGO
 Nos salvere suo iussit Epistolio .
 Non etenim sapientem animum mortalia turbant:
 Rectus in antiquo se tenet ille statu.
 Quas ego iam referam grates? Mihi curta supellex.
 Attalica exhilarat non mihi gaza lares .
 At, scio, parva probant Superi donaria: saepe
 Pendet ab excelso vile anathema tholo .
 Ne ferar ingratus, properatum sic pede in uno
 Hoc MUDERSBCHIAE nuncupo xeniolum.
 Forte alias meliora dabit maturior aetas,
 Otia si faciens adiuvet orsa Deus .*

Dabam Boneti in Hirpinis Idib. Octobr. c181cccxe



IO. ANT. CASSITTI

AMOENITATES IVRIS

DE I. A. O. C. A. P. V. T. I.

Emendatur , et illustratur L. 32. pr. ff. de
auro , arg. leg.

IULIUS PAULLUS . Lib. II. ad Vitellium. d. l.

„ PEDICVLIS argenteis adiuncta sigilla ae-
„ nea , ceteraque omnia , quae ad eamdem
„ similitudinem redigi possunt , argento fa-
„ cto cedunt „

Ita libri omnes .

§. I.

PEDiculos illos AGCVRSIVS explicabat fulcra
et bases , quem refellit BYNKERSHOE-
KIVS (a) . tum quod *pediculus* hac significatio-
ne nusquam occurrit , tum etiam quod *si-*
gillo , sive parvae statuæ ex aere non con-
venit basis argentea . At quis nescit ICTos
vocabula passim usurpare peregrina , ac singu-

A

lari

lari prorsum significatione ? (b) Deinde sigillum esse quidem poterat aeneum , sed Corinthium , et aeri Corinthio pretium fuit ante argentum . (c)

(a) *Observ. Iur. lib. IV. cap. 23.*

(b) ECKARD. *Hermen. §. CXIV. C. A. DVCKE. RVS &c.*

(c) PLIN. *H. N. lib. XXXIV. cap. 1. Vid. FLOR. lib. II. cap. 16. & nostrum IAVOLEN. l. 100. §. 3. ff. de legat. 3.*

§. II.

Praetereo LEVNGLAVIVM (a) qui ad *pendicula* , idest funes confugit . Non ita desperandum erat , quasi negotium vehisset ad restim . *Pediculus* BYNKERSHOEKII , nempe *os utris sive fundibulum* cuinam probabitur , quod nec ipsi arridere potuit auctori ? Satius erat ACCVRSIO subscribere .

(a) *Adn. ad ff. n. 46.*

§. III.

Sed BYNKERSHOEKIO pruriebant ungues . Itaque PEDICVLIS excussis RETICVLA substituit . Mox dubitat *reticula* accipias quae *comis ingentibus implent* matronae (a) , an *reticula alia sive sepimenta* ad instar retis , quibus

bus vulgi aditus prohibetur . De istis in testimonium adducitur solus FESTVS (b) Addi poterat VLPIANVS noster (c) . *Glossae Regiae LABBAEI* „ CANCELLVM , RETICVLVM a cassibus , *idest retibus diminutive* , unde *Cancellarii qui stant in cancello* „ Item *Glossa MARCHESINI* (d) „ CANCELLVS fenestra RETICVLATA „

(a) IUVEN. *Satyr.* II. v. 96.

(b) V. *Secespitam*.

(c) L. 17. §. 4. ff. de act. empt.

(d) *Ad lib. IV. Reg. cap. 1.*

§. IV.

Ego vero , ut quod est fatear , non laudo BYNKERSHOEKII *reticula* . Mulieres Bynkershoekianas cum reticulo argenteo in capite , et sigillis aeneis dependentibus non Romanas dicerem , sed forsitan Aegyptias . Certe nemo auctorum veterum de tam lepidi ornatu loquitur ; neque in numis , gemmis , statuīs , anaglyphis aliquid simile occurrit , opinor . Posterior significatio , scilicet *sepimenti* non opportuna loco . Cancelli ita infixerant aedibus , ut avelli non possent . Cur non ? Si exemptiles fuissent et argentei,

tei, neque prohibuissent aditus vulgi; neque manus furunculorum. Atqui omnia infixa cedunt aedibus (a), non veniunt argenti nomine in legato. Certe suppellectili saltem talia reticula adnumeraveris, quoniam in aliam speciem non videntur cadere: parro *suppellex* argento facto non continetur (b).

(a) L. 12. §. 25. ff. de instrum. vel instrum. leg. &c.

(b) ULPIAN. L. 27. §. 6. ff. h. t.

§. V.

Quid tu? inquires. Si ACCURSIANA interpretatio displicet; at saltem priusquam BYNKERSHOEKIO adsentiaris, videsis utra ex coniecturis sequentibus appareat probabilior.

Dicerem posse emendari: PELVICVLIS *argenteis adiuncta sigilla aenea*. Ita restituchat ROMVALDVVS pater meus ὁ μακάριτος iudicii acerrimi ICTUS, nisi quod animo angebatur quia nusquam *pelviculae* in Latio vidisset: deinde quod aenea sigilla et emblemata pelvibus argenteis adiungi non poterant. Atqui nihil erat quod senem optimum turbaret. In *Notis* quae vulgo TIRONI et SENECAE (a) tribuuntur, disertis litteris legitur PELVIS.

PE-

PÆLVICULA . Has *Notas* si genuinas nolumus, at esse plane antiquas (exceptis postremis aevo sequiore additis) pluribus probarem si hoc agerem . Conferendus interim BURMAN-
NVS (b) Porro pelves etiam argenteae ornari poterant emblematibus et sigillis ex aere Corinthio . Iuvamur testimonio PRVDEN-
TII (c) .

Multa divitis domo

Sita est per omnes angulos supellex :

Fulget aureus scyphus ,

Nec AERE defit expolita PELVIS .

Pelves argenteas in usu fuisse constat ex alio PAVLLI nostri fragmento (d) PETRO-
NIVS (e) *Attulerunt unguentum in argentea pel-
vi* . Cumque pelves vasa patula , et immania plerumque essent (f) idcirco viri in sumptu parciores *pelviculas* sibi comparabant . Pelviculae huiusmodi sigillis aeneis expolitae argento facto cedunt , quod hac nostra L. monet PAVLLVS . Paene idem alibi scripserat (g) *Vasis argenteis legatis , emblemata quoque ex auro infixa legato cedunt .*

(a) *Comment. IV. cap. 2. not. 30. 31.*

(b) *Præf. ad GRUT. Corp. Inst. p. XIII.*

(c) *In Enchirid. ode ult.*

(d) *L. 3. §. 3. ff. de supell. leg.*

(e) *Fragm. Tragurit. p. LIX.*

(f) *IVVEN. Satyr. III. v. 277. APVL. Metam. lib. IX.*
p. MIQ 455. 557.

(g) *Recept. Sent. lib. III. tit. VI. §. 89.*

§. VI.

Alteram nunc propono emendatiunculam fortasse modestiorem. Unicam litteram immuto; lego scilicet AEDICVLIS pro PEDICVLIS. Quid sint *aediculae* ex argentea, quid *aenea sigilla* aediculis adiuncta, nunc edisseram.

§. VII.

Celebris est locus in ACT. APOST. (a) *Demetrius argentarius faciens AEDES (vads) ARGENTEA Dianae, praestabat artificibus non modicum quaestum. En tibi aediculas nostras, siue armariola, vel arculas in templi speciem effigiatas, quibus inclusum erat Ephesiae Dianae sigillum. Divus CHRYSOSTOMVS* (b) *vertit ἱερός κιβώριον μικρά. AVGVSTIN. CALMET* (c) *monet in pluribus libris manu exaratis ad oram versiculi eadem verba esse*
ad-

adscripta, ἰσως κιβώτια μικρά i. e. parva ciboria: scilicet ex CHRYSOSTOMO, si quid video. Demetrii ciboria atria ex argento, et delubra vocavit ARATOR (d) Poeta non obscuri nominis sub Iustiniano.

Infelix Ephesi Demetrius arte locata

Sacrilegis delubra locis (e) argentea subtus

Solvere vota suae pretio maiore Dianae etc.

Innuat fabricatas huiuscemodi aediculas, ut easdem superstitiosi homines, cœu donaria siue anathemata, in ipso Dianae templo suspensas relinquerent. Non meretur contemni ARATORIS coniectura: nam et PAVSANIAS (f) narrat appensas tholo existisse in Templis Graeciae celebrioribus quasdam aediculas Deorum simulacra continentes.

(a) Cap. XIX. v. 24.

(b) Homil. XLII. in Acta.

(c) In Comment. ad h. l.

(d) Hist. Apost. lib. II. p. 137.

(e) Subdit Poeta:

Quae nunc simulacra sacellis

Quae posterius dare iura fœdis, quos advena Paullus
Territat?

(f) In Eliac. poster. sive lib. VI. p. 167. 59.

Negue tamen antiqui aediculis huiusmodi semper ad vota utebantur. Saepe etiam lares avitos includebant armariolo in templi modum facto. PETRONIVS (a) *Grande armarium in angulo vidi; in cuius AEDICULA erant Lares argentei positi. Immo et Penates in aedacula gestatoria e Troja deductos probat IO. ARGOLIVS (b) Alia quoque Numinum simulacra parvis thecis claudebant. DIO CASSIVS (c) Aedacula quaedam Iunonis, quae in Albano super mensam dedicata orientem solem spectabat, ad septentrionem conversa est. Hipponae aediculam in trabe stabuli memorat L. APVLEIVS (d) ut et Silvani signum theca fraxinea semiclusum legimus in marmore FABRETTI (e) Cernitur Vulcanus clausus aedacula in numo apud HARDVINVM (f) In carneola Stoskii Harpocrates domesticus sedet in simili armario (g). Immo penes eundem Stoskium servabatur Aedacula marmoris Parrii, in qua Ceres Eleusina (h). Stoskiana gazza nunc Regium Berolinense Museum exornat, ibique etiamnum descripta monumenta*

ser-

servantur. In lapide GRVTERI (i) nominatur sigillum cum ara arae superpositum. Hoc sigillum arulae adiunctum aedacula est, vel certe non multum differt. Huc etiam traho quod de fabro quodam scribit TERTULLIANVS (k) *Aedicularum aut signa fabricat*. Superstitiosissimi gentium Graeci, tales loculos invexere. Naïdia dicuntur POLYBIO, καδίσκοι ATHENAEO, et artifices aedicularum *ναωνοίτες* appellat Scholiastes *Rhetoricorum* ARISTOTELIS. Confer anicem optimum ALEXIVM AVREL. PELICCIA (l).

(i) *Satyric*. p. 14.

(b) *Ad PANVIN. de Ludis Cirsens. lib. I. cap. 16. adn. 42.*

(c) *Hist. lib. XXXIX. tom. 2.*

(d) *Metam. lib. III. p. 131.*

(e) *Pag. CCXXX.*

(f) *In PLIN. H. N. lib. III. cap. 12. p. 189. n. 10.*

(g) *RODOLPH. VENUTI Collect. Rom. Antiq. Tab. XXIII.*

(h) *Vid. PHIL. VENUTI Distrib. in vol. II. Cortonensium.*

(i) *Pag. CCLXXII. n. 1.*

(k) *De Idolol. cap. IV.*

(l) *De Christ. Eccl. Polit. tom. III. part. 1. Diss. VI. III. §. 3.*

§. IX.

Tenes iam aedicularum, ut puto; nunc de sigillis adhuc pauca monebo. Quisnam paternos
illos

illos *deos* nescit; quos in *sinu* portabat villica HORATIANA (a)? Lares erant vel Penates, nam palmares plerumque fiebant, si ARNOBIO (b) fides. Deos *minutos*, et *patellarios* per deridiculum dicit PLAUTVS (c) non quod ipsis *patella* sacrificaretur (ut putant eruditi), sed quia mirum quantum exigui essent Dii in emblematis *patellarum* plerumque expressi. Sane CICERONI (d) memoratur *patella grandis cum sigillis et simulacris Deorum*. De *icunculis*, et *sigillis* quae religiosi veteres circumgestabant eruditissime disserit FRANG. M. BONADA (e).

(a) *Lib. 11. Od. 13. v. 27.*

(b) *Adv. Gent. lib. VI. p. 230.*

(c) *Cistell. act. II. Sc. 1. v. 46.*

(d) *Att. II. in Verr. lib. IV. cap. 21.*

(e) *De Vet. Rom. Simulacr. cap. IX.*

§. X.

Favet PAVLLO a nobis restituto COMMODIANVS (a) qui Lares aeneos conclusos aediculis indicat. Scriptoris antiqui simplex ruditas ita me afficit, ut versus eius incomptos etiam lectori non iniucundos futuros arbitrer.

Ti-

*Titanes (b) vobis Tutanos dicitis esse
 Immites, tacitos. Sub culmina vestra rogatis
 Tot LARES AEDICVLIS (c), simulacraque fi-
 eta Titanis.
 Adoratis enim stulti letho malo defunctos,
 Non legem illorum LVGENTES (d). Non
 ipsi loquuntur,
 Et Deos audetis arramine dicere fusos?
 Solveritis eos magis in vascula vobis.*

(a) *Inscr. adv. Gent. Cap. XX.*
 (b) Ita legendum, uti suadet achrostichis.
 (c) Perperam vulgo AEDICVLAS.
 (d) Male Vulg. libri LEGENTES.

§. XI.

Hinc porro Christiani usum arripuerunt
 sacras icunculas, vel Sanctorum reliquias par-
 vis thecis argenteis ornandi in templorum
 speciem. Lipsana B. STEPHANI Protomarty-
 ris in capella argentea commemorat EVODIVS
 Episcopus Uzalensis B. AVGVSTINO coevus,
 nisi alius est auctor Commentarii de Mira-
 culis S. STEPHANI (a). Adde quae con-
 gessit DV-FRESNE (b).

(a) *Lib. I. cap. 8.*
 (b) *Glossar. Vol. II. p. 222.*

§. XII.

§. XII.

At enim quis mihi obiiciet vix posse imagines Deorum Larium, et istiusmodi thecas religioni destinatas legato argento cedere. Cui reponimus, ea quae sibi privatim sacra veteres constituissent profana fuisse habita (a). Non *sacros* dixit Penates QUINTILIANVS (b), sed in illis *ALIQUID SACRI* esse iudicavit. Signa quaedam Deorum ex avito sacrario C. Heii Civis Mamertini emisse Verrem narrat CICERO (c) Appositè TIBVLLVS (d).

Quin etiam sedes iubeat si vendere avitas

Ite sub imperium, sub titulumque Lares.

Sed nil hac de re illustrius testimonio TERTULLIANI (e) *Domesticos Deos, quos Lares dicitis, domestica potestate tractatis pignerando, venditando, demutando aliquando in cacabulum de Saturno, aliquando in trullam de Minerva . . . Publicos aeque publico iure foedatis, quos in hastario vectigales habetis.* In quadam Inscriptione exstante adhuc Regii in Brutis relata a GONZALO DE SALAS (f), quamque nuper doctissime illustravit CAN. JOSEPH MORISANVS (g), videmus T. Tarfe-

nium

nium testamento legare LARES ARGENTEOS SEPTEM. Itaque aediculae argenteae sigillis adiunctis, etiamsi religionis instrumenta essent, in libero fuerunt commercio Romanorum, et poterant cedere argento legato.

(a) MARCIAN. L. 6. §. 3. ff. de divis. rer. & qual. PAVLLVS l. 9. §. 1. ff. ad l. Iul. peculat. FESTVS. v. Sacer mons.

(b) Decl. CCCXXVII.

(c) In Verr. Aft. II. lib. IV. cap. 2.

(d) Lib. II. eleg. IV.

(e) Apolog. cap. XIII. adde MERILL. Obs. lib. IV. cap. 27.

(f) Not. ad PETRON. Satyric. p. 117. Coniecta est in Corpus ORTIERIANVM p. CLXXIV. n. 7. & describitur a FABRETTO cap. IX. pag. 639.

(g) Marm. Rezin. Diss. VI.

C A P U T II.

Resolvitur geminatio in L. 44. ff. de relig. et sumpt. funer.

IVLIVS PAVLLVS lib. III. Quaestionum d. I.
Mihi autem videtur illum (locum) religiosum esse ubi quod est principale conditum est,

est, id est caput, CUIUS IMAGO FIT inde
cognoscimus.

Ita Codex Tuscus.

§. I.

Sic legendum edicit CUIACIUS (a) At BYN-
KERSHOEKIUS (b) neminem sic loquutum af-
firmat, immo si loquatur non intelligi. Haec
plane sensum commodum non fundere fatetur
vel MARCKARTVS (c). Hinc HALOANDER le-
git, *Unde qualis cuiusque imago sit, cognoscitur.*
SVERINIUS ex libro veteri, *Cuius imago sit,*
unde cognoscitur. BYNKERSHOEKIUS, *Unde cu-*
ius imago sit cognoscitur. FREHERVS *Cuius ima-*
go fit, et unde cognoscitur. NISPEN, *Cuius i-*
mago fit, et inde cognoscitur. MARCKARTVS
denique (ex quo hausimus adductas Critico-
rum varietates) restituit. *Huius imago fit, et*
inde cognoscitur. Mox frigide contendit Ictum
ita abrupte loquutum ut Florentiae legitur.

(a) Obs. lib. XXI. cap. 4. et alibi.

(b) Obs. lib. I. cap. 5.

(c) Interpr. Recept. lib. II. cap. XIX. §. 1.

§. II.

Ego vero miror clarissimos Interpretes non
vi-

vidisse in his: **CVIVS IMAGO**: latere egregiam, ac verissimam lectionem si regulam *geminandi* adhibeamus . Etenim nil rectius ac facillius quam postremam litteram **CVIVS** , et **IMAGINIS** primam ita geminare ut enascatur particula **SI** : qua de re fiet sermo huiusmodi. *Mihi autem videtur illum (locum) religiosum esse , ubi quod est principale conditum est, idest caput, CVIVS (si) IMAGO fit , inde cognoscimur . Scilicet si capitis nostri imago fiat , inde cognoscemur .*

6. III.

Caput scite a **PAVLLO** dicitur id quod est principale . Hac eadem formula utitur **LACTANTIUS** (a) . *Omnis enim iustitia eius similis est humano corpori caput non habenti , in quo tametsi membra omnia et locis suis constant et figura et habitudine , tamen quoniam deest ID QVOD EST OMNIUM PRINCIPALE , et vita et sensu caret .* Similem usurpat loquutionem **SALVIANVS** (b) . *Morbido enim capite nil sanum est , neque ullum omnino membrum officio suo fungitur , ubi QVOD EST PRINCIPALE non constat .* Etiam **VEGET. RE-**
NA-

NATVS (c), et BRAVLIO Episcopus Caesaratugustanus (d) capitis principatum dicit in corpore ; *primam partem corporis* QUINTILIANUS (e) et ISIDORVS (f). Alia quaedam de dignitate capitis corradit MERILLIVS (g) ex antiquis.

(a) *Divin. Inst. lib. VI. cap. 9.*

(b) *De Gubern. Dei lib. VII. p. 369.*

(c) *Artis Veterin. lib. II. cap. 1.*

(d) *Epist. II. ad Isidor.*

(e) *Inst. Orat. lib. XI. cap. 3.*

(f) *Orig. lib. XI. cap. 1.* vide quoque PAVLLIN. *Epist. II.*

(g) *Obs. lib. II. cap. 40.*

§. IV.

Porro ex capite potissimum dignoscuntur homines. *Facies homini tantum* (a) immo hominum ipsorum *sua cuique facies* (b). Quapropter cum in facie vultuque nostro sint decem aut paullo plura membra, nullae duae in tot millibus hominum indiscretae effigies existunt. (c) Eleganter MINVTIVS FELIX (d) *Eadem figura omnibus, sed quaedam cuique lineamenta deflexa*, SEVERIANVS (e) Gaborum Episcopus *Cum tam multae sint formae in tam multis millium millibus nulla est*
simi-

similitudo . Vel si orbis terrarum fines excurreris , neminem similem inveneris , aut si inveneris , praeterquam naso vel oculo , ut insolitae rei eluceat miraculum . Neque alia de caussa scribit ARNOBIUS (f) discrimina in vultibus data esse , nisi ut singuli se possent differentium signorum proprietatibus noscitare .

(a) ARIST. *Hist. anim. lib. 1. cap. 9.* CIC. *de Legib. lib. 1. cap. 9.* PLIN. *H. N. lib. XI. cap. 37.*

(b) PLIN. *H. N. lib. XI. cap. 51.*

(c) Idem . *lib. VII. cap. 1.*

(d) *Octav. cap. XVIII.*

(e) *De mundi creat. Orat. III.*

(f) *Lib. III. p. 125.*

§. V.

Cadaver *ἀσαρκος* , vel capite destitutum , quoniam abest vultus , aut *unum vultum et immobilem possidet*(*) ignoti est nominis . Reper- tum est Romae in tabula marmorea venustis- simum epigramma Graecum , quod pari ele- gantia vertebat VITVS M. GIOVENAZZIVS (a) :

Quis osseam , Viator , intuens formam

Hylasne fuerim dicat , anne Thersites ?

Vir doctissimus *osseam formam* se dixisse putaverat cum OVIDIO in *Ibin* : at is *larvam* dixerat (b) .

B

Bel-

Bella geram tecum: nec mors mihi finiet iras

Saeva sed in manes manibus arma dabit.

*Tum quoque cum vacuas fuero dilapsus in
auras,*

Exanimis mores oderit umbra tuos.

*Tum quoque factorum veniam memor umbra
tuorum,*

Insequar et vultus OSSEA LARVA tuos.

*Larva autem proprie τῆ σκελέρῃ significationem
penes Latinos nanciscitur. PETRONIVS (c)
LARVAM argenteam attulit servus sic apta-
tam, ut articuli eius vertebraeque laxatae in om-
nem partem verterentur. Hanc cum super men-
sam semel iterumque abiecisset, et catenatio mo-
bilis aliquot figuras exprimeret, Trimalchio ad-
iecit*

*Heu heu nos miseros, quam totus homuncio
nil est!*

Sic erimus cuncti posquam nos auferet Orcus,

Ergo vivamus dum licet esse bene.

*Ad rem facit achates antiquus a GORIO (d)
descriptus. In lectulo triclinii discumbunt vir
et uxor: adijcitur lemma sequens.*

ΠΑΡΔΑΛΑ ΕΣΘΙΕ ΠΕΙ
 ΝΕ ΤΡΥΦΑ ΠΕΡΙΛΑ
 ΜΒΑΝΕ ΘΑΝΕΙΝ ΣΕΔΕΙ Ο ΓΑΡ
 ΧΡΟΝΟΣ ΟΛΙΓΟΣ
 ΑΧΑΙ
 ΖΗΧΑΙC

*Veritas licet: Pardala . ede . bi-
 be . deliciare . ample-
 ctere . mori . te . oportet . quia
 tempus . breve .*

*Achiva
 vivas*

Haec ita accipio . Achiva coniux Parda-
 lam virum prioribus verbis compellat ; eum-
 que ad comessandum provocat : dein Pardala
 uxori obtemperans bibit , superdicens , ΑΧΑΙ
 ΖΗΧΑΙC , quae formula erat propinandi apud
 veteres . Aliam inscriptionem referunt GRVTE-
 RVS (c) et FABRETTVS (f) .

D. M.

SANDALIVS . DICIT
 AMBVLA . SEQVERE
 ME . CVM . OENOFORO
 CVM . CALICE . ET
 ΤΑΡΑΝΤΙΟΝΕ

ubi , ni fallor , *tarantio* idem est quod *con-*

gerro, sicuti *tapanta* PETRONIO (g) dicitur uxor Trimalchionis Fortunata, scilicet ex Graeco τὰ πάντα ἢ *Uxor Trimalchionis Fortunata* appellatur, quae numos modio metitur. Et modo quid fuit? Ignoscet mihi Genius tuus: noluisse de manu eius panem accipere. Nunc nec quid nec quare, in caelum abiit, et Trimalchionis *TAPANTA* est. Sed age in viam. Larvam illam, cuius meminit idem PETRONIUS in fragmento superius adducto, GLOSSARIUM Petronianum interpretatur *Sceletum aptum et coagmentatum*. GLOSSAE VETERES. Σκελετός *Larva, Sceletus*. GLOSSAE IAT GR. (h) *Sceletus, larva nudis ossibus cohaerens*. Glossographus haec petivit procul dubio ex L. SENECA (i). Audi Philosophum *Nemo tam puer est, ut Cerberum timeat, et tenebras, et Larvarum habitum nudis ossibus cohaerentium*. Elegantissime igitur OVIDIUS larvam dixit *osseam*, quia mali lemures, sive larvae sub ossea figura sceleti occurrere credebantur. Immo et ita mortuorum umbras in theatris productas opinor, non forma tantum pallida et macilenta, ut ex Grammaticis

cis tradit IVL. CAES. SCALIGER (k) Prostat inter monumenta Matthaeiana (l) larva quaedam scenica nudam exhibens calvariam, et omnino cadaverinam. Similem aliam deprehendi apud FICORONVM (m). Vir doctus AMADTVS (n) autumat huiusmodi larva usos veteres in theatro ut simulacrum mortis exprimerent: sed et diceres hac specie lemures consuevisse exhiberi. Coronidis loco addo, gigantum horrificam praetulisse imaginem defunctorum phantasmata. VIRGILIUS (o)

Infelix simulacrum atque ipsius umbra Creusae

Visa tibi ante oculos, et nota maior imago.

SENECA (p)

Vaga per lucos simulacra virum

Majora viris.

IDEM alibi (q)

Maiora notis monstra

PLINIVS (r) *Offertur ei mulieris figura humana grandior pulcriorque.* TACITVS (s) *Oblata ei species muliebris ultra modum humanum.* Monumentum M. Luceii (t) de idolo mortui.

Maior erat notâ corporis effigie.
 Formido enim nocturna mirum quantum ad-
 augeat umbras et corpora, VAL. FLACCUS (u)
 . . . *ignota captus regione viarum.*
Noctivagum qui carpit iter, non aure quie-
scit
Non oculis, noctisque metum niger auget u-
trimque
Campus, et occurrens umbris maioribus ar-
bor.

- (*) APVLEIUS *Apolog.* p. 342.
- (a) *Schol. ad Vatican. Livii Fragment. pag. XLVI.*
- (b) *in Ibin. v. 139. seqq.*
- (c) *Satyric. cap. XXXIV.*
- (d) *In Columbar. Liviae Augustae tit. CLXXXVIII.*
pag. 213.
- (e) *Pag. DCLI l. n. 2.*
- (f) *Cap. X. p. DCCV.*
- (g) *Fragm. Tragurit. p. . . .*
- (h) *Conf. PP. MAVRINOS ad CANG. Glossar. h. v.*
p. 210.
- (i) *Epist. XXIV.*
- (k) *Art. Poet. lib. 1. cap. 16. p. 24. D.*
- (l) *Vol. II. tab. LXXXV. fig. 5.*
- (m) *Dê Larvis. tab. XLIX.*
- (n) *Ad Monum. Matthæian. l. cit.*
- (o) *Æneid. lib. II. v. 772.*

(p)

- (p) *In Oedipo* v. 174.
 (q) *In Thyeste* v. 674.
 (r) *Lib. VIII. epist. 27.*
 (s) *Annal. XI.*
 (t) *GRVTER. p. MCXXIII. n. 7.*
 (u) *Argón. lib. II. v. 43.*

§. VI.

Iam videbis PAVLLI nostri sententiam de principatu capitis, et rationem insuper quam subiungit, placuisse aliis non poenitendis ex antiquitate scriptoribus. Ad carmen illud VIRGILII (a).

Avulsumque humeris caput, et sine nomine corpus,

hoc pacto disserit SERVIVS. *Corpus sine agnitione, sine nomine: a capite enim quis nomen habet.* Concinit DONATVS (b). *Ridiculum caput pro toto homine: nemo enim ore contempto ex aliis membris velit hominem significare.* ISIDORVS Hispalensis (c). *Primo pars corporis caput, datumque illi hoc nomen eo quod sensus omnes et nervi inde initium capiant, atque ex eo omnis vivendi causa oriatur, ibi enim omnes sensus apparent. . . 'Facies dicta ab effigie. Ibi est enim facta tota fi-*

gura hominis , et unius cuiusque personae cognitio . Neque aliter accipio effatum Platonium (d) totum hominem in capite vultuque esse , quam quod inde cognoscimur monente PAVLLO , sive quod sit in capite uniuscuiusque personae cognitio , ut ISIDORI sermone utar .

(a) *Aeneid. lib. II. v. 558.*

(b) *In TERENT. Andr.*

(c) *Oriz. lib. XI. cap. I.*

(d) *APVLEI. de Dogm. Platon. p. 36.*

§. VII.

Observavi poetas huc respexisse non semel . Optime fingit VIRGILIUS (a) miseros Euryali et Nisi parentes eorum necem intellexisse statim ac *nota capita* adspexerunt . Contra scribit LVCANVS (b) in trunco Pompeii *nullam mansisse figuram* , eo quod capite orbatum iacebat . IDEM (c) alibi pingit parentes qui anxie disquirunt filiorum cada- vera post caedem ,

*Cum iam tabe fluunt , confusaque tempore
multo*

Amisere notas .

Im-

Immo (d) describit quosdam ita sollicitos ut auderent.

. . . . cum qua cervice recisum

Conveniat quaesisse caput.

Mox etiam (e) de confuso Marii cum ceteris cadavere

Nec magis informes veniunt ad littora tranci.

Qui medio periere freto : quid perdere fructum

lavit, et ut vilem Marii confundere vultum?

Ut scelus hoc Sullae, caedasque ostensa placet.

Agnosendus erat.

(a) *Lib. IX. Aeneid. v. 466. seq.*

(b) *Civ. B. lib. VIII. v. 677.*

(c) *Lib. II. v. 166.*

(d) *v. 172.*

(e) *v. 289.*

§. VIII.

PAVLLVS docet cognosci nos ex capite, si eius fiat imago. Nemo hoc nescit: sed quaedam ad rem facientia lubet congerere in studiosorum gratiam. SOLINVS (a). *Si qui corporum formas aemulantur, postpositis quae reliqua sunt, ante omnia effigiant modum capitis, nec in alia membra prius lineas destinant, quam*

quam ab ipsa , ut ita dixerim , figurarum arce
 auspiciū faciant . PLINIVS (b) . *Esse nobis
 curae solet ut facies nostra ab optimo quoque
 artifice exprimatur .* CÆCIL. CYPRIANVS (c) .
*Ad defunctorum vultus per imaginem deti-
 nendos expressa simulacra .* ISIDORVS (d)
*Simulacra a similitudine nuncupata , eo quod
 manus artificis ex lapide aliave materia eorum
 vultus imitantur in quorum honorem finguntur .*
 Animadverte statuas imaginesque ex capi-
 te et vultu potissimum expressas , nempe
 ut per caput et vultum simulacri exemplar
 noscatur . Conqueritur PLINIVS (e) permutari
 capita statuarum (erant enim plerumque ex-
 emptilia), idque opinor factum ut quisque
 maiorum suorum statuis capita apponeret pre-
 tiosioris materiae . Subdit auctor . *Alco ma-
 teriam conspici malunt homines quam se no-
 sci .*

(a) *Epist. II. ad Autium , quae Polyhistori praemittitur .*

(b) *Lib. VII. Epist. 33. Vide etiam Lib. V. Epist. 9.*

(c) *De Idolor. Vanit. cap. 1. adde VAL. MAX. Lib. III.
 cap. 5. §. 1.*

(d) *Orig. lib. VIII. cap. 11.*

(e) *H. N. Lib. XXXV. cap. 2.*

§. IX.

Quid fuerint clypei, disci, cycfi, apsides, pinaces, stylopinacia, protomae, opia, sthetaria, thoraces, thoracletae, docebunt SALMASIVS (a), et SPONIVS (b). *Clypeata imago Q. Ciceronis ingentibus lineamentis usque ad pectus ex more picta* memoratur MACROBIO (c). In hisce simulacris constat vultus rationem praecipuam fuisse habitam. Quare et vultus dicebantur. HORATIVS (d).

. aera

Fortis Alexandri vultum simulantia . . . et MOX (e) ... expressi vultus per aënea signa. PLINIVS (f) *Vultus Epicuri per cubicula gestant.* Quo de more CICERO (g). *Epicuri imaginem non modo in tabulis nostri familiares, sed etiam in poculis et in anulis habent.* Etiam Academici Platonis effigiem in anulis gestabant (h).

(a) *Ad Trebell. Pollion.*

(b) *Sect. IV. p. 152.*

(c) *Saturn. lib. II. cap. 3.*

(d) *Lib. II. Epist. 1. v. 240.*

(e) *V. 248.*

(f) *H. N. Lib. XXXV. cap. 2.*

(g)

(g) *De Finib. lib. V. cap. 1.*

(h) B. EPIPHAN. *Haer. XXVII.*

§. X.

Sacri vultus imagines sunt Imperatorum pectore tenus expressae (a). D. AMBROSIVS (b) *Sola aere fusa Principum capita, et ductos vultus de aere vel marmore adorari.* Item *facies, et vultus* dicuntur passim Caesarum effigies in numis percussae (c), qua de loquutione disserit IAC. GOTHOFREDVS (d). Testimoniis veterum ab eo congestis addo SOLINVM (e). *Pecunia signata disparibus vultibus.* Et quoniam si capitis imago fiat, inde cognoscimur; ex vultibus cūsis in numismate antiquarii genuinum secernunt a spurio, vel falsas inscriptiones ab impostoribus adfictas detegunt (f).

(a) L. 1. C. *publ. laet. lib. XII. VOPISC. in Probo cap. 23. Dignitatem Probi Imperatores nostri prudenter et consecrandam vultibus, et ornandam templis, et celebrandam ludis circensibus iudicarunt.*

(b) Relatus a CUIACIO *Obs. lib. XXI. cap. 4.*

(c) L. 3. C. *de vet. num. potest.* L. 1. C. *Th. si quis sel. circ. exter. incid.*

(d) *Ad d. l. 1. C. Th. tom. 111. p. 183.*

(e) *Polyhist. Cap. LVI.*

(f)

(f) ROBERT. *Scient. Numism. Instruct. X.*

§. XI.

Cum veteres opinarentur totum hominem in capite esse, praesertim quod caput ac vultus Titium a Seio distingueret, nil mirum si in sepeliendo cadavere maximopere curarint ne caput inhumatum relinqueretur. ARCHYTAS ad nautam (a).

*At tu nauta vagae ne parce malignus a-
renae*

Ossibus et capiti inhumato

Particulam dare

Quandoque etiam solo capiti honorem sepulturae tributum legimus. Refert VELLEIUS (b) caput Vari abscissum latumque ad Merobaudem, et ab eo missum ad Caesarem gentilitii tumuli sepultura honoratum fuisse: IVL. CAPITOLINVS (c). Marcus non exultavit interfectione Cassii, caputque eius humari iussit. De Pompeii capite LUCANVS (d)

*I molo securus veniae, fassusque sepulcrum
Posce caput: cogit pietas imponere finem
Officio.*

Immanis iniuria mortuo fieri putabatur si
quan-

quando eius caput insepultam circumferretur hastae vel sudi infixum (c).

(a) HORAT. *Lib. I. Od. 28. v. 23.*

(b) *Lib. II. cap. 119. sect. 5.*

(c) in *M. Ant. Philos. p. XCII.*

(d) *Civ. B. Lib. VIII. v. 784.*

(e) Vide quae innumera corradii DEMPSTER. *ad ROSIN. lib. X. cap. 10.* quibus addenda narratio HERODIANI *lib. 1. cap. 13.*

§. XII.

In epigrammate Homerici sepulcri quod visebatur in Io insula (a) et relatam quoque est in Anthologiam (b) haec legimus.

Ενθάδε τήν ἱερὴν κεφαλὴν κατὰ γαῖα καλύπτει

Ἀνδρῶν ἡρώων κοσμητορά θειῶν Ὀμηρον

Latine vertitur

Condit humus caput haec sacrum qui versibus arma

Fortia divinis heroum ornavit Homerum.

Prodiit Liburni an. MDCCLXXIII. opusculum MENR. KRIENEN militis Moschl, quo se se reperisse iactat in insula Io sepulcrum Homericum cum pervulgato isto epigrammate. Sed quis tam gloriose adsentiatu militi?

Hic.

Hic etiam (ut noscas ingenium) CLEMENTI XIV. Pontifici Maximo obtrudere infelicitèr tentavit in alabastro manum Sesòstris cum inscriptione ΣΕΘΩΝΣΟΣ ΧΕΙΡΑ . Nomen illius Regis variè effertur, *Vexoris*, *Suexosis*, *Sesoosis*, *Sesonchosis* (c), sed *Sethonsis* vocabatur scilicet, et cuius nomen evanuit, iam superest manus integra labore et cura KRIE-
NENII eruta post annos bismille octingentos. (d) Risum teneatis amici ? At ego demiror paene credulum fuisse tam grandibus nugis CHRISTOPH. AMADVTIVM virum eruditissimum, atque hypercriticum. (e) Sed ut absolvamus historiam Homerici epigrammatis, monemus etiam hodie exstare Neapoli in sacello IOVIANI PONTANI marmor sane antiquum, in eoque insculpta carmina ipsissima quae retulimus, nisi quod *Homero* extruso Αλκιβιάδην subiecit marmorarius. IACOB. MARTORELLIVS nil de Homérico sepulcro cogitans, mira de tam novis metri legibus hariolabatur, atque ita vertebat latine

Praeclari capitis pignus hic terra recondit

Qui fuit heroum dux , et decus album
Alcibiades. (a)

(a) HERODOT. *in vita* , nisi alius sit auctor opusculi .

(b) *Lib. III. epigr. 3.*

(c) ISAAC. VOSS. *ad IVSTIN. lib. 1. cap. I. et lib. 11. cap. 3.*

(d) Vid. MARSHAM. *ad Saec. XIV. et XV.*

(e) *In Comment. ad monum. matthaciana vol. 11. Tab. 8. fig. 4.*

§. XII.

Denique advertes *sacrum* dici *caput* non in epigrammate solum Homérico , sed et alibi. PLATO (a) *Principio Dii figuram capitis ad rotunditatem mundi finxere, in eoque duos illos animae divinae circuitus statuerunt. Est autem caput membrum corporis divinissimum, reliquorumque membrorum princeps.* Hinc per caput iurabant veteres (b). VLPIANVS : (c) *Si ego detuli ut per Deum iurares, tu per caput tuum iurasti.* Praecipue post mortem humana capita Plutoni devota adeoque *sacra* putabantur (d). Lubet cum VIRGILIO (e) desinere

*Non tum illi flavum Proserpina vertice
crinem*

*Abstulerat, Stygioque caput damnaverat
Orco.*

Ergo

*Ergo Iris croceis per caelum roscida pen-
nis*

*Devolat , et supra caput adstitit . Hunc
ego Diti*

*Sacrum iussa fero teque isto corpore solvo.
Sic ait et dextra crinem secat ; omnis et
una .*

*Dilapsus calor , atque in ventos vita reces-
sit .*

(a) In *Timaeo* p. 481. col. 2. ex vers. FIGINI.

(b) VIRG. *Aeneid.* lib. IX. v. 300. OVID. *Heroid*
III. v. 107. & *Pont.* Lib. III. *Eleg.* 3. v. 68. IUVEN.
Sat. VI. v. 16.

(c) L.3. §.4. ff. *de iureiur.* ubi GOTHOFR. n.23. alio-
rum testimonia cumulat.

(d) MACROB. *Saturn.* lib. 1. cap. 7. huius opinionis
originem indicare videtur . Auctor *Consolationis ad Li-
viam* v. 253.

*Flamma diu cunctata caput contingere sacrum
Erravis posito lenta sub usque toro .*

(e) *Aeneid.* lib. IV. v. 699.

Asseritur lectio recepta L. 7. §. 3. ff. de bon. damn.

IVL. PAVLLVS lib. sing. de portionibus quae liberis damnatorum conceduntur. *Si plures filios damnatus habeat, feruntur exempla, per quae pluribus liberis omnia bona damnati concessa sunt. Sed et Divus Hadrianus in hac sententia rescripsit. Favorem apud me causam liberorum Albin, filiorum numerus facit: cum ampliare imperium hominum adiectione potius quam pecuniarum copia malim. Ideoque illis paterna sua concedi volo, quae manifestabunt tot possessores, etiamsi acceperint universa.*

I. Constantem esse in postremis verbis lectionem librorum omnium fatetur BYNKERSHOEKIUS (a). Sed et ipse, et quivis alius negare non possunt maximam subesse in eo sermone difficultatem. Hinc Vir Cl. emendat. *Quaenam infestabunt tot possessores, etiamsi acceperint universa? et mox aliter. Quae manifeste dabunt tot possessores, etiam si ac-*
ce-

ceperint universa. Cl. CONRADVS *Parerg.* cap. 6. §. 4. et 5. mavult emendare quae manifestabunt TOTA possessores, licet WIELINGIO *Lect. Iur. Civ. lib. II. cap. 10. §. 9.* eiusmodi mutatio improbetur.

II. Ego vero crism trulentam procul abesse iubeo, et WIELINGII durior inter-pretamento non utor : nam sola interpunctio peccarunt hic sequiores librarii, et res facillime transigi potest, si per censores licet. Ita mecum distingue. *Ideoq. illis pater- na sua concedi volo quae manifestabunt, tot possessores etiamsi acceperint universa.*

III. Rem totam brevi aperiam. Damna- torum bona a Principe obtinebant plerique importunis precibus. AMMIANVS (b). *Sunt in Palatiis nonnulli alienarum rerum avidi, si qui calicum vel aliud petissent ex usu, etc. Peti- tores dicebantur et competitores (c) item fla- gitatores (d).*

IV. Plerique igitur petitores patrimonium damnati Albini a Fisco acceptum inter se di- viserant. Hadrianus hoc aureo rescripto ius- sit concedi Albini liberis bona quae manife-

starent paterna, scilicet quae probarent in patris dominio fuisse. PATERNA SVA CONCEDI VOLO QVAE MANIFESTABVNT. Addidit nihil referre quod bona Albini universa tot possessores iam accepissent. CONCEDI VOLO, ETIAMSI TOT POSSESSORES ACCEPERINT VNIVERSA.

(a) *Obs. lib. II. cap. 16.*

(b) *Lib. XXXI. p. 835. vide & SYMMACH. lib. X. epist. 55.*

(c) *L. 1. & 2. C. de petit. bonor. sublat. lib. X. L. II. C. de murileg. lib. XI. Vide IAC. GOTHOF. in Paratisto ad Cod. Th. lib. X. tit. 10. de petitionib. & ultro datis, & delatoribus tom. III. p. 428.*

(d) *AMMIAN. lib. XXI. in fin.*

C A P U T IV.

Varia de Maleficis et Mathematicis, deque Exorcismo Paganorum.

VLPIANVS lib. VII. de offic. Procos. in Col-
lat. Legum Mosaic. et Romanarum Tit. XV.
§. 3.

Interdicta est Mathematicorum callida impostura, et obstinacitate persuasio. Nec hodie pri-

primum interdici eis placuit , sed vetus hæc prohibitio est . Denique exstat SC. Pomponio et Rufo Coss. factum , quo cavetur ut Mathematicis , Chaldaeis , Ariolis , et ceteris qui similem incertum facerent , aqua et igni interdicator , omniaque bona eorum publicentur . Et sic æternus gentium , qui si id fecerit ut in eum animadvertatur . Sed fuit quaesitum utrum scientia huiusmodi hominum puniatur , an exercitio et professio . Et quidem apud veteres dicebatur professionem eorum , non notitiam esse prohibitam . Postea variatum : nam dissimulandum non est , nonnumquam irrepsisse in usum ut etiam profiterentur , et publice reprehenderent : quod quidem per temeritatem eorum factum est , qui visi fuerunt vel consulere vel exercere quam qui fuerat permissum . Saepissime denique interdictum est fere ab omnibus Principibus , ne quis omnino eiusmodi ineptius se immisceret , et varie puniti sunt hi qui id exercuerunt mensura scilicet et consultationis . Nam qui de Principis salute , capite puniti sunt , vel qua alia gravi poena adfecti : enimvero si qui de sua suorumque levius .

§. L.

ICTI nostri libertatem , ac philosophiam admirari non desino . *Callidam imposturam , et ineptias* hoc loco magiam , et vaticinia nuncupat . Etiam alibi (a) . *Si incantavit , si imprecatus est , si ut vulgari verbo impostorum utar , exorcizavit : non sunt ista medicinae genera , tametsi sint , qui sibi profuisse cum praedicatione adfirmant .* Haec de Christianis accipiunt LECTIVS , D. GOTHOFREDUS , CAR. ANNIBAL FABROTUS , DV-CANGE (b) Immo H. GROTIUS (c) : *Valde iniquus Christianis fuit Ulpianus homo Tyrius , ut qui de poenis Christianorum scripserit libros complures . Cogitabat procul dubio vir magnus de celebri loco LACTANTII (d) . Domitius de Officio Proconsulis libris VII. Rescripta Principum nefaria collegit , ut doceret quibus adfici oporteret eos qui se cultores Dei profiterentur .* Sed CUIACIUS (e) iamdiu observaverat legi oportere . *Domitius de Officio Proconsulis libro VII. . Hunc deinde sequuti sunt MENAGIUS (f) BYNKERSHOEKIUS (g) HEINECCIUS (h) .* Favent etiam codices manu exarati a MICH. THO-

THOMASIO consulti (i) . Frustra igitur est GROTIUS qui putavit odium illud in Christianos evomuisse ICTum nostrum peculiari tractatione composita . Ignoscendum homini pagano si de rebus agens ad religionem pertinentibus libro illo *VII. de Offic. Procos.* inter alia , etiam Rescripta et Constitutiones Principales de Christianis collegit . Sed redeo ad *exorcistas* , quos impostores iudicabat VIPIANVS , et nego taxari ista iniuria Christianos . Iudaeis attribuit ICTi verba MERILLIVS (k) : nam et Iudaei exorcizabant , quod ille probat ex LVCIANO , et IVSTINO Martyre . Addendi TERTVLLIANVS (l) IRENAEVS (m) ORIGENES (n) EPIPHANIVS (o), qui Iudaeos exorcizasse testantur . Idem passim legimus in Sanctis Bibliis Novi Testamenti (f) . IOSEPHVS (q) exorcizandi artem a Salomone primum traditam , atque ita inter Hebraeos propagatam fabulatur . Neque vero in virtute Creatoris eosdem exorcizasse indicio est narratio illa , quam subdit IOSEPHVS de Eleazaro . Is coram Vespasiano , et Romanorum exercitu daemonia expellebat virtute cuiusdam radidis

annulo inclusae. Hanc radicem IOSEPHVS a-
libi (a) *baaras* vocat.

- (a) *L. 1. §. 3. ff. de extr. cogn.*
- (b) *In Glossar.*
- (c) *In Flor. Spars. ad h. 1.*
- (d) *Div. Inst. lib. V. cap. 10.*
- (e) *Obs. lib. X. cap. 34.*
- (f) *Amoen. Iur. Civ. cap. XII.*
- (g) *Obs. lib. V. cap. 23. & De Relig. Peregr. Dis-*
sert. 1.
- (h) *Hist. Iur. lib. I. cap. 4. §. 339. in not.*
- (i) *In adn. ad LACT. l. cit.*
- (k) *Obs. lib. V. cap. 22.*
- (l) *Adv. Marcion. lib. IV. cap. 26.*
- (m) *Lib. II. cap. 3.*
- (n) *Contra Cels. lib. I. & IV. & Tract. XXXV. in*
Matth. XXVII. 63.
- (o) *Haeres. XX.*
- (p) *MATTH. Cap. XII. v. 27. MARC. cap. IX. v. 37.*
LUC. cap. IX. v. 49. Act. Apost. cap. XIX. v. 14.
- (q) *Antiq. Iud. lib. VIII. cap. 2.*
- (r) *De B. Iud. lib. VII. cap. 25.*

§. II.

Sed et Pagani ipsi exorcizabant, quod
nunc latius ostendere est animus. Exorci-
smus a Graeco *εξορκισμο* *sermo increpationis*
est (a). Atqui Pagani energumenos suos a-
gno-

gnoscebant, quos numinum afflatu in furorem actos coniuratione sive *sermone* illo *inreparationis* liberabant.

Putaveram olim *energumenos* paganorum fuisse, qui VLPIANO *Fanatici* dicuntur, ubi docet, eosdem non redhiberi (b) : atque ita sane GVL. BVDAEVS (c) *Fanaticos* acceperat. Sed ego in aliam deinde sententiam veni, et mox tradam, postquam interpretationes aliorum leviter tetigerim.

Scholiastae Basilicorum perperam explicant *febri delirantes*; nam plane isti redhiberi possunt (d). STEPH. FORCATVLVS (d) *initiatos Bacchicos*, contra BARN. BRISSONIVS (f) *Semiviros Cybeles* designari *Fanaticorum* nomine crediderunt. Sed PRVDENTIVS (g) de his praesertim

Furere, ac rotare IVS putatur MYSTICVM,

neque *ius mysticum* veluti insaniam traduxisset VLPIANVS. Satis alibi probatum dedimus (h) quanta religione mysteria prosequerentur viri in Republica praeclarissimi. Alii (i) *Fanaticos* interpretantur *Fanorum sacrificu-*

ficulos, nec diffiteor in tali significatione plerumque occurrere (*k*) ; sed de servis *Fanaticis* VLPIANVS agebat, ac velim doceant, ubinam gentium servi fuerint Sacerdotes ; ut necesse iam sit de aliis omnino *Fanaticis* cogitare.

Nos vero observamus in fragmento ICTI haec de *fanaticis* referri. I. eosdem circa *fana* bacchari solitos, et iactare caput. II. aliqua profari, seu responsa reddere. III. id per *luxuriam* factitasse. Neque ergo *fanatici* sunt Bacchici, aut Galli, aut ceteri denique Sacrificuli ; sed homunciones cerebrosi, et verberones nequissimi ante fana miris modis insanientes, ac vaticinia effutientes ridicula, ut in popularium celebritate tamquam numine afflati suspicerentur.

Porro *fanatici* antequam occiperent imposturam, publice excipiebant numen. Ex altari enim fumum turis incensi, hiatu quantum poterant maximo et patulis naribus, hauriebant. Ritum indicare videtur TATIANVS (*l*). *Est quae potu aquae insanit, vel ture adhibito demens fit ; hanc tu*
va-

vaticinari dicis . Disertissime TERTULLIANVS (m) . *Producatur aliquis ex iis qui de Deo pati existimantur , qui aris inhalantes numen de nilote concipiunt , qui ructando curantur , qui anhelando profantur* . Recte profantur in optimis libris habetur : et male IAC. PAMELIVS (n) reposuit *praefantur* . Fanaticꝝ etiam VLPIANO (o) *profari* dicuntur , i. e. *responsa reddere* . Quare et *Vates* audiebant . MINVT. FELIX (p) *Vates et ipsi absque templo sic insaniunt , sic bacchantur , sic rotantur* . Melius legeretur , *Vates et ipsi ante templa sic insaniunt* etc. De his IVSTIN. (q) *Fauno fuit uxor nomine Fatua , quae assidue divino spiritu impleta , velut per furorem futura praemonēbat : unde adhuc qui inspirantur fatuari dicuntur* . Ludiones nostri amabant ineptire ac desipere in corona stultorum circa *fana ob luxuriam* , et animi levitatem teste ICto . Addo etiam servos ancillasque gregi fanaticorum dedisse nomen domino tolerante , quia ex artificio vaticinii peculium non mediocre corrogabant . B. LVCAS (r) . *Factum est autem euntibus nobis ad orationem ,*
puel-

puellam quamdam habentem spiritum Pythonem obviare nobis, quae quæstum magnum præstabat dominis suis divinando Videntes autem domini eius quia exivit spes quæstus eorum etc. Neque vero negaverim, hanc ancillam fanaticam Apollinis Pythii vere fuisse daemoniacam. Sed impostores plerumque eiusmodi ministerio functos oportuit. Ex his colligo *fanaticos* dici *VLPIANO* homines de plebis faece ad fani vestibulum vaticinia simulantes ut lucellum vel gloriolam inde captarent: atque isti sacrificulis, vel certe *energumenis* non videntur ad censendi.

(a) *IESSE* Episcopus in Epistola. *Bibl. PP. tom. XIV. p. 68.* *AMALARIVS FORTVNATVS de Eccl. Offic. lib. 1. cap. 12.* *GVIBERTVS Tornacensis de Offic. Episc. Cap. XLI.*

(b) *L. 1. §. 9. 10. ff. de adilit. aedil.*

(c) *In adu. ad h. l.*

(d) *L. 4. §. 1. ff. cod.*

(e) *Necromant. Dial. LXXXVIII. p. 196.*

(f) *Antiq. Seled. l. II. cap. 13.*

(g) *In Romano.*

(h) *Comment. ad marmor Baianum p. XVI.*

(i) *VOSS. in Etym. v. Fanum.* *HEINECC. ad BRISSEN. de Verb. sign. h. v.*

(k) HEINEC. citat ex REINES. inscriptionem unicam
class. XIV. n. 139. Adde GRVT. p. 312. n. 7. p. 654. n. 6.
p. 313. n. 1.

(l) Orat. contra Graecos p. CXCIX.

(m) Apolog. cap. XXIII.

(n) Comment. ad h. loc. n. 359.

(o) L. 1. §. 10. ff. de aedil. edict.

(p) Octav. cap. XXVII. sect. 3.

(q) Hist. lib. XLII. cap. 1.

(r) Act. Apost. cap. XVI. v. 16. v. 19.

§. III.

VLPPIANVS noster (a) nominans quosdam alibi,
qui per vicos more insanorum derident la loquebantur
videtur de *energumenis* loquutus, nempe de
larvatis. Laryis exterritos FESTVS explicat,
et NONIVS homines *larvarum incursatione ani-*
mo vexatos. PLINIVS (b) fuisse scribit qui a
nocturnis Diis, Faunisq. agitantur. Nocturna
numina *larvae* sunt, *maniae, empusae*, et a-
lia id genus *terriculamenta* mortalium.
Istos ergo Pagani putarunt a malo dae-
mone percelli. Nostri enim scriptores
hac de re tamquam satis pervulgata ad
Gentiles loquuntur. TERTVLLIANVS (c).
Edatur hic aliquis sub tribunalibus vestris,
quem

quem daemone agi constet. IUSTINVS Martyr (d) *Illi qui a larvis corripuntur, atque humi abiiciuntur, quos a daemonibus correptos, seu arreptitios et furentes nominant omnes.* LACTANTIUS (e). *Is quem constat incursionem daemonis perpeti.* Et quidem, ut ictus monet, per vicos discurrebant. MIN. FELIX (f) *Hi (daemoniaci) sunt et furentes, quos in publicum videtis excurrere.* Immo magicis artibus humo affligi homines daemone incurstante iactabant, et hoc maleficium APVLEIO obiecit SICINIUS AEMILIANVS (g).

(a) L. 4. §. 1. ff. de aedil. edicto.

(b) H. N. lib. XXX. cap. 10.

(c) Apolog. Cap. XXIII.

(d) Apolog. II. ad Antonin. Pium p. XXIII. lit. F.

(e) Div. Inst. lib. IV. cap. 27.

(f) Octav. cap. XXVII.

(g) Perlege Apolog. APVLEII p. 364. seq.

§. IV.

Erat et aliud furoris genus, quod veteres a diis immitti opinabantur. De Oreste, Athamante, Agave, Pentheo, Proetidibus, Lycurgo notae sunt fabulae (a). Sed praecipue morbum comitiale divinitus iniectum vul-

vulgus antiquorum tenuit . HERODOTVS (b) eo malo narrat correptum Cambysen ira numinis , quod Aegyptium templum violasset . Refert quoque PHILOTIMVS (c) aetate sua percrebuisse in plebe opinionem , quod morbi comitialis insania a Cybele , Neptuno, Apolline Nomio, vel Hecate immitteretur . Hinc dicebatur *ἰσπα νόσος sacer morbus* , quidquid alii de veriloquio disputent .

Sicuti Graeci Hecaten huius mali auctorem , ita Romani Dianam faciebant , quia terrestris Hecate Diana est . HORATIVS (d)

*Ut mala quem scabies , aut morbus regius
urget ,*

*Aut fanaticus error , et iracunda Diana
Vesanum fugiunt pueri etc.*

Augebat fidem menstrua morbi reversio , quae Lunae sive Dianae cursum quodammodo imitatur ac sequitur (e) . Hinc aeger *lunaticus* dicitur IUL. PAVLLO (f) et B. MATTHAEO Apostolo (g) *σεληνιαζόμενος* . Item B. HIERONYMVS (h) . *Non vere lunaticus , sed qui putabatur lunaticus ob daemonum fallaciam , qui observantes lunaria tempora creaturam infatuare*

re

re (i) cupiebant , ut in Creatorem blasphemiae redundarent . Christianos daemoniorum incursum hoc in morbo agnovisse vel unus iste HIERONYMI locus indigitat . Pariter ISIDORVS (k) . *Haec passio caduca vocatur eo quod cadens aeger spasmodum patitur . Hos et vulgus lunaticos vocat, quod per lunae cursum comite- tur eos insania daemonum , Idem et larvatio . Ipse etiam est morbus comitialis idest maior , et diutinus (melius lego divinus).* Novissime DV- RANDVS (l) *Energumēni sunt qui a daemonibus obsessi sunt , vel lunatici , sive morbum cadu- cum patientes . . . quia secundum defectum men- tis in defectu lunae maxime patiuntur .* Sed et Synopsis Basilicorum (m) ubi IAVOLENVS (n) dicit *comitialem morbum habentes* vertit δαιμο- νισμός . Atque ita etiam paganos credidis- se eruimus ex PHILOTIMO (o) : quia narrat in morbi sacri curatione verba circulatoris ad daemionium dirigi consuevisse . Immo ARETAEVS (p) disquirens cur morbus iste sa- cer ac divinus vocaretur , profert quorum- dam sententiam , qui lunaticos homines dae- mone corripi iudicarunt .

- (a) Insignis est. locus EVRIP. in *Hippolyt.* p. 232.
- (b) *lib. III.*
- (c) *lib. de Morbo sacro cap. III.* Nunc libellum vulgo HIPPOCRATI adiudicant.
- (d) *Art. Poet. v. 453.*
- (e) MERCVRIAL. *Prax. lib. I. cap. 26.*
- (f) *L. 43. §. 6. ff. de aedil. edict.*
- (g) *Cap. IV. v. 24. & cap. XVII. v. 15.*
- (h) *ad d. cap. IV. MATTHAEI.*
- (i) Ita lego pro eo quod vulgo scribitur *infamare*.
- (k) *Orig. lib. IV. cap. 7.*
- (l) *Ration. Div. offic. lib. II. cap. 6. §. 5.*
- (m) *Cap. XXXIX.*
- (n) *L. 53. ff. de Aedil. edict.*
- (o) *d. cap. III.*
- (p) *Diut. Adfect. lib. I. cap. 4.*

§. V.

Lymphati, ac *Cerriti* notiores sunt, nec re-
ducuntur in medium, praesertim cum ipse
ab aliis praeoccupata pertractare nolim. Sed
an *Lucumones* in hunc censum referendi? Plane
FESTVS, vel si inavis PAVLLVS Diaconus in
Epitome id videtur insinuare. *Lucumones quidam
homines ob insaniam dicti, quod loca ad quae venis-
sent, infesta facerent.* GER. VOSSIVS (a) plura dis-
seruit de *Lucumonibus*, et ad *Lycaonas* con-

fugit, an ad rem viderint alii. ALEX. SYMMACHVS MAZOGHVS (b) alia conguessit scitu iucunda, et praesertim Lucumonis etymon derivat a $\lambda\alpha\chi\alpha\lambda\alpha\lambda\alpha$ *lathan* h. e. *insidiari*. Neuter expedit obscurissimum Auctoris, vel Breviatoris locum. Sic statue. *Lucus* est a Graeco $\lambda\omicron\chi\iota\alpha\varsigma$ *silva*: $\lambda\omicron\chi\iota\alpha\varsigma$ a $\lambda\omicron\chi\alpha\varsigma$ *insidiae*. Item *Silva* est a $\sigma\acute{\upsilon}\lambda\eta$ *praeda*. Etiam Hebraeis $\lambda\alpha\chi\alpha\lambda\alpha$ *lochan* significat *insidias struere*. Denique latrones a Romulo in asylo collecti *Luceres* et *Lucerenses* audiebant a *lucos*, et *praeda*, et *insidiis*, quia prisci homines rapti vivebant in saltibus. Quapropter *Lucumones* dixerim adpellatos quasi *luci homines* scil. homines silvicolas insidiis ac latrocinio famosos. Fragmentum EEXI ita restituo. *Lucumones quidam homines ob insidias dicti, quod lucos ad quas venissent infestos facerent.*

(a) *Etym. h. v.*

(b) In Auctar. ad voc. *l. cit.*

§. VI.

Recensitis larvatis, lunaticis, lymphaticis, cerritis, et postquam probavi dilucide ut potui in re obscura, eosdem a par-
ganis

ganis tamquam daemone correptos , sive energumenos fuisse habitos : nunc ostendam circulatores et aretalogos immo et mystas usurpasse ad curandos huiusmodi furiosos exorcismum .

Impostura plane fuit gentiliū sacerdotum ut fano celebritatem , numini religionem , sibi lucrum compararent , miracula fingere (a) , et idcirco submittere servulos ac populares mercede conductos , qui in ipso templi vestibulo miris modis insanirent , ut postea lustrationibus , aut sacrificio publice curati admirationem plebeculae concitarent . MINVT. FELIX (b) ita de daemonibus loquitur . *Morbos fingunt , terrent mentes , membra distorquent , ut ad cultum sui cogant , ut nidore altarium vel hostiis pecudum saginati , remissis quae constrinxerant curasse videantur .* Concinit LACTANTIVS (c) . *Occulte in visceribus operi valetudinem vitiant , morbos citant , somniis animas terrent , mentes furoribus quatiunt , ut homines his malis cogant ad eorum auxilia decurrere .* Colligo ex his , sacrificium plerumque fuisse adhibitum pro exorcismo . De sacrificio plane co-

gitabat PLAVTVS (d) ubi scripsit . . .

Adulescens, quibus heic precijs porci veniunt

Sacres sinceri? Numum unum a me accipe;

Iube te piari de mea pecunia,

Nam ego quidem te esse insanum certo scio.

Et quidem porcos Laribus sacrificari solito; ad piandum insanum innuit VOSSIVS (e) . Sed melius diceres pios fuisse porci sacrificio *ceritos*, quia Ceres ipsos in furorem egisse putabatur (f) , ac Cereri porcellos immolabant (g) .

Quoad lunaticos ; constat magos praecipue et circulatores eorum suscepisse curam, atque amuleto usos ex draconis cauda (h) . Qui aderant, despuebant, ut iram Deorum a se procul averruncarent (i) . Sed et sputamento ipsos epilepticos inficiebant , sperantes daemoniorum fugam . Hinc PLAVTVS (k) .

Multos iste morbus homines macerat

Quibus insputari saluti fuit .

Item APVLEIVS. (l) *In cubiculo despuuntur caduci comitiales .* Suspisor hoc factum tum
quod

quod ominosa omnia et dira spuendo execrabantur veteres, tum etiam quod serpentes sputo fugari atque interfici (m), et daemones serpentum imaginem indolemque habere opinarentur. Iam hoc postremum IOANNES LAMIVS optime demonstravit in Dissert. singulari de *serpentibus sacris*. Huc etiam facit Inscriptio DONIANA (n).

CARPVS AVG. L.
PALLANTIANVS
SANCTIS
DRACONIBVS
DD.

(a) Vide ORVT. p. LXXI. CHRISTOPH. AVG. HEV. MANN. in Disp. de *Mirac. Vesposiani*. CUDWORTH. Syst. Int. cap. IV. §. 15. ubi MOSSHEIM &c.

(b) Octav. cap. XXVII. sect. 3.

(c) Div. Inst. lib. 2. cap. 14.

(d) Menachm. Act. II. sect. 2. v. 15. Mèmini VARONEM de R. R. aliter hunc PLAVTI locum efferre Adeundus.

(e) Etym. v. Sacer.

(f)

(g) OVID. Fast. lib. I. v. 349. Conf. Monum. Mattheiana vol. I. class. VI. tab. LXXI.

(h) PLIN. H. N. lib. XXX. cap. 10.

(i) Idem *lib. XXVIII. cap. 4.*

(k) *Capt. act. III. sc. 4. v. 21.*

(l) *Apologia.*

(m) ARIST. *Hist. Anim. lib. VIII. cap. 33.* NICANDER
in *Theriac. p. 9.* AELIAN. *Hist. Anim. lib. 2. cap. 24.*
AETIVS *Med. lib. II. cap. 107.* PLIN. *H. N. lib. VII.*
cap. 2. et d. lib. XXVIII. cap. 4.

(n) *Class. I. n. 59.*

§. VII.

Neque tamen solo sacrificio, amuleto, aut sputamento daemones exorcizabant circulatores pagani, sed et verborum coniuratione. Praetereo anilia incantamenta ad leniendos dolores. De his fuse disserunt I. GOTHOFREDVS (a) et S. H. VAN IDSINGA (b) ac testimoniis quae ipsi congerunt adiungendi GELLIVS (c) et COEL. AVRELIVS (d). De exorcismo proprie accepto loquor, sive de coniuratione energumeni.

Narrat PHILOTIMVS (e) in curandis comitialibus verba ad Deum ac Daemonium dirigi, ad Deum nempe qui movisse mentem putabatur, veluti ad Cybelen, Dianam, Apollinem Pastorium, itemque ad Daemonem cuius animatione aeger insaniebat. Quaelibet enim

nim numina suos *daemones* quasi satellites, et ministros habebant. Porro illa verba impostorum *movebant Deum*, et *Numini imperabant* (f) ut agnoscas verum sermonem increpationis, sive *exorcismum*. Rem totam expedit elegantissimum FESTI (g) fragmentum. *Piari eos veluti proprio verbo ait Verrius, qui parum sint animati cum mentis sãe non sint, et per quædam verba liberentur incommodo.* Idem PHILOTIMVS (h) incantatione liberatos refert caducos ab *expiatoribus*, *magis*, et *circulatoribus*, quorum *simulatam vitæ sanctimoniam* reprehendit. Apollonius, opinor, ex his unus fuit: et plane eiusdem exorcismi in amoenis PHILOSTRATI fabulis utramque paginam faciunt (i).

VLPIANVS ergo noster (k) *incantationes*, *imprecationes*, et *exorcismos* commemorat vel Iudaeorum, vel potius vulgarium *impostorum* sive *circulatorum* temporis sui. De Christianis quidem non ita aperte loquitur, sicuti volunt qui odium Icti in Christianos inde potissimum coniectant, quod *exorcismis* parum credulus fuerit. Hoc unum constat, et vul-

gi exorcismis, et divinationibus, et magicis quibuscumque artibus VLPIANVM fuisse infensissimum, eaque omnia seu putidum commentum, subdolanque imposturam non raro exagitasse gravi illa irrisione, et sana Philosophorum. Quapropter docuimus aliquando (l) et variis argumentis evicimus ejusdem VLPIANI verba de *sacculariis* (m) non esse referenda ad *praestigiatores* cum magno CVIACIO (n), sed omnino adplicanda *sectoribus zonariis τοῖς βαλαντικτομοῖς*.

(a) ad L. 3. C. Th. de malef.

(b) *Varior. Iur. Civ. cap. XVI.*

(c) N. A. lib. IV. cap. 13.

(d) lib. I. cap. 5.

(e) lib. de Morbo Sacro cap. III.

(f) FLIN. H. N. lib. XXVIII. cap. 2. sect. 4.

(g) v. *Piari*.

(h) l. cit. cap. II.

(i)

(k) l. 1. §. 3. ff. de extr. cognit.

(l) *Obs. Crim. ad FRANC. IOS. DE ANGELIS Part. III.*

§. 678.

(m) L. 7. ff. de extr. crim.

(n) *Obs. lib. X. cap. 27.*

§. VIII.

§. VIII.

Nunc eo redeo, unde aberraveram. **VLP-
PIANVS** in descripto Fragmento primum ait.

Interdicta est Mathematicorum callida impostura, et OBSTINACITATE persuasio. Malle
rescribas, obstinata caecitate persuasio. Numquam
enim deprehendi obstinacitatem in auctoribus.

Mox. Chaldaeis, Ariolis, et ceteris qui similem INCERTVM fecerunt, aqua et igni interdicitur. PITHOEVS emendat, qui similem artem; nimis duriter: LIPSIVS, similem quaestum satis licenter: IOS. NEAIVS, (a) similem incertum, ut sermo ad magicas intentiones referatur. Cedo auctorem. Ego vero miror doctissimos criticos viam regiam non trivisse. Legendum erat, qui similem INCEPTVM fecerunt i. e. mercimonium et quaestum. Artificium nempe huiusmodi nonnisi lucelli spe vilissimi homines profitebantur. Sic impostor ille Chaldaeus memoratus APVLEIO (b) arcana fatorum stipibus emerendis edicebat in vulgus. Pulcre VAL. MAXIMVS (c) Chaldaeos ait quaestuosam mendacii suis caliginem iniecisse, quoniam obscuris ambagibus involvebant

bant responsa ad uberiores *quaestum* . VL-
PIANVS SCtum commemorat Pomponio et
Ruso Coss. factum de efficiendis Chaldaeis ,
scil. L. Pomponio Flacco et C. Caelio Ruso
Coss. anno urbis 770. , anno post SC. Li-
bonianum, biennio ante L. Iuliam Norba-
nam . Sed et Vitellius edicto iussit *intra Ka-*
lend. Octobris. urbe Italiaque mathematici exce-
derent (d) et olim T. Cornelius Hispallus praee-
tor peregrinus , M. Popillio Laenate Cn. Cal-
purnio Coss., edicto Chaldaeos *intra decimum*
diem abire ex urbe atque Italia iussit (e) . Ni-
hilominus hoc malum vetitum semper et re-
tentum fuit : adeo falli et fallere hominibus
dulce est .

Sequitur . *Et sic aeternus gentium, qui si id*
fecerit, ut in eum animadvertatur . SGHULTIN-
GIUS testatur *externus legi in plerisque Co-*
dicibus ubi vulgo est aeternus ; sed putat hic
non mediocrem subesse lacunam . Profecto
abruptus cernitur sermo et perplexus . Opti-
ane cum NERIO nostro ita restitues : *Et si ce-*
terarum gentium quis id fecerit, ut in eum a-
nimadvertatur . Neque tamen IOS. NERIUS ,
ne-

neque alius quem sciam, explicaverunt hanc
sententiam. Rem ita statuo. Chaldaei non
ex artis sed ex gentis vocabulo nominaban-
tur (f). Hinc edicto Praetoris peregrini o-
pus fuit ut pellerentur, quod ex VALERIO
nuper adnotavimus. Proscriptis igitur Chal-
daeis, dubium oriri poterat an urbani Ma-
thematici SCto comprehenderentur, et ce-
terarum gentium divinatores per Italiam va-
gantes; ideoque in ipso SCto diligenter adie-
ctum, animadverti debere et in ceterarum
gentium impostores. Ad rem facit SVETONII
locus vexatissimus (g). *Nullis tamen infensior
quam vernaculis et Mathematicis, ut quisque
deferretur, inauditum capite paniebat.* HADR.
TURNEBVS *divinaculos*, IOS. SCALIGER *veracu-
los aut vericulos* substituunt. Sed *vernaculi*
sunt qui divinationis artem ex populo profi-
tebantur, nomine isto donati ut distingue-
rentur a Chaldaeis, qui *hospites* dicti. (h)
In Glossis ISIDORI, *Vernacellus qui suscitatur per
dies festos*. Ingeniose restituit GANGIVS (i).
*Vernaculus qui lussitat per dies festos: idque
GRAEVIVM, et ALMELOEVVENIVM fugit dum
Glo-*

Glossas illustrarent. Iam vides cur alibi damnentur malefici *in quacumque parte terrarum sint* (k). Nempe his verbis et Chaldaeos et quavis ex gente alios perstringere voluit Imperator.

Pergit VLPIANVS. *Professionem eorum, non notitiam esse prohibitam*. Scientia non prohibita, sed traditio ac doctrina. Iam enim ludibria istiusmodi in scientiam eruperant. Firminus ille AVGVSTINI (l) non segnis consultor Mathematicorum, sciebat aliquid in his litteris: at Firminum idcirco nil contra has leges fecisse iudicarem. Qui notitiam habebant periti dicuntur AMMIANO (m), at qui profitebantur, doctores malarum artium eidem dicti (n). Sed graviter PAVLLVS (o) tam doctores quam peritos deterret. Non tantum divinatione quis, sed ipsa scientia, eiusque libris melius fecerit abstinere. VALENTINIANVS denique (p) discrimen omne hoc in scelere sustulit. *Culpa similis est tam prohibita discere quam docere.*

Addit VLPIANVS. Nonnumquam irrepsisse in usum, ut etiam profiterentur, et publice RE-
PRE-

PREHENDERENT. Emendabat PITHOEVS, publice responderent. Augiae stabulum hic videt NERIVS. Dixeram alibi (q) posse restitui, publice prehenderent. Nam Chiromantae manum poscebant, sive prensabant arroganter, ut obviorum fata inspecta vola praedicarent. IUVENALIS (r)

. . . . frontemque manumque

Praebeat Vati crebrum poppysma roganti. Posses minori motu legere, publice deprehenderent, eadem significatione. Sic PLAVTVS (s) vel illae quae pallio me deprehendere.

Denique scribit ICTUS. Quod quidem per contumaciam et temeritatem eorum factum est, qui visi erant vel consulere vel exercere, quam qui fuerant permissum. Male scribitur, qui visi erant: legendum omnino, qui ausi erant. Sequentia emendavit SALMASIVS (t), quam qui fuerit permissum. NERIVS aliter, quam cui eorum fuerat permissum. Ego simplicius et melius, ni fallor. Per contumaciam et temeritatem eorum factum est qui ausi erant consulere vel exercere, quam quia fuerat permissum.

(a) *Analect. lib. II. cap. 3. p. 26.*

(b)

- (b) *Metam. lib. II. p. 23.*
 - (c) *lib. I. cap. 3. §. 2.*
 - (d) *SVET. in Vitell. cap. XIV. TACIT. Hist. lib. II. cap. 62. TERTULLIANVS COAEVUS VLP. (de Idol. cap. IX.) Vrbs et Italia (inquit) interdicitur mathematicis.*
 - (e) *VAL. MAX. dl lib. I. cap. 3. §. 2.*
 - (f) *CRG. de Divin. lib. I. cap. 1. GELL. Noct. lib. cap. 9.*
 - (g) *In Vitellio cap. XIV.*
 - (h) *APVL. Metam. lib. II. p. 23.*
 - (i) *In Glossar. h. v.*
 - (k) *L. 7. C. de malef.*
 - (l) *Confess. lib. VII. cap. 6.*
 - (m) *Lib. XVI. cap. 8.*
 - (n) *Lib. XXVI. p. 567.*
 - (o) *Sent. lib. V. cap. 21. §. 4.*
 - (p) *L. 8. C. de malef.*
 - (q) *Obs. Crimin. ad DE ANGELA de Delict. Part. III. §. 119. p. 19.*
 - (r) *Sat. VI. v. 582.*
 - (s) *Milit. Ad. I. §. 1.*
 - (t) *Ad LAMPRID. in Alex. cap. XXVII.*
- §. IX.

Sat vidimus VERIANI in maleficorum vulgus odium ac supercilium. Quis porro non miretur CONSTANTINVM Magnam Christianae Religionis vera sapientia imbutum, attamen (a) superstitiones ac naenias impostorum

rum

rum non tolerare solum sed cumulare etiam
 laudibus? Ita quidem hactenus opinati sunt
 eruditi post LEONEM Philosophum (b) et
 Scholiastas Basilicorum (c). Ego vero induci
 vix possum ut sanctissimum Principem eo
 caecitatis in media luce delapsam putem.
 Iam disputavi hac de re (d): lubet nunc non
 iniunctam Philologis mantisam attexere, et
 Constitutionem illam diligentius expendere.
 Verba accipe.

*Eorum est scientia punienda et severissimis
 merito legibus vindicanda; qui magicis accincti
 artibus aut contra salutem hominum moliri,
 aut pudicos animos ad libidinem deflectere dete-
 gentur. Nullis vero criminationibus implicanda
 sunt remedia humanis quæsitæ corporibus, aut
 in agrestibus locis innocenter adhibita suffragia
 ne maturis vindemiis metuerentur imbres, aut
 grandine lapidatione quaterentur, quibus non
 cuiusquam salus aut existimatio laederetur, sed
 quorum proficerent actus: ne divina munera et
 labores spernerentur. Data X. Kal. Iun. Aquil-
 eiae, Crispo et Constantio Caes. Coss.*

*Remedia humanis quæsitæ corporibus nonni-
 si*

si *medicamenta* esse possunt . Scio IAC. GOTHOFREDVM (e) velle hic designatas cantiones magicas quas teste APVLEIO (f) veteres medici ceu remedia vulnerum usurpabant . Sed CONSTANTINVS *quaesita* adpellat *remedia* ut et CICERO (g), scilicet *investigata* . Haec loquutio herbis dumtaxat aliisque pharmacis convenit ; nam certe verba et carmina *dicuntur non quaeruntur* .

Negotium magis facessunt *suffragia innocentet adhibita* . Iam hic doctissimus GOTHOFREDVS omnino magica videt sacra , ac tempestariorum caeremonias . Subdit *inanem esse ALBERICVM GENTILEM*, qui haec ad agrorum lustrationes et dies *Ragationum* transfert . Hanc explicationem et ipse proposui antequam GENTILIS opinionem rescirem , mihi que gratulor quod in tanti viri sententiam nescius inciderim . Nunc attentius ALBERICVM defendam .

Quis *ambarvalia* veterum ignorat ? Quis porro nescit primaevos Christianos adoptasse caeremonias paganorum ita tamen ut ipsas ad summam Religionis nostrae puritatem ac

sanctimoniam attollerent ? Hinc et *amibarvalibus* videntur substituisse quasdam supplicationes precesque sacras, retento, quoad fas erat, paganorum ritu. *Rogationes* à Mamerco primum Episcopo institutas plerique autumant circa an. 495. (h) At SIDONIUS coaevus (i) non institutas refert à Mamerco sed emendatas. *Erant quidem, inquit, quot salva fidei pace sit dictum, vagae tepentes infrequentesque, utque sic dixerim oscitabundae supplicationes, quae saepe interpellantium prandiorum obicibus hebetabantur, maxime aut imbres aut serenitatem deprecaturae, ad quas, ut nil amplius dicam, figulo pariter atque hortulano non oportuit convenire.* Inferre tuto possumus, agrestium supplicationes ante quintum saeculum exstitisse. Plane N. BASILIUS (k) ARCADIVS Imp. (l) aliique scriptores IV. saeculi (m) commemorant *litaniae* et *processiones*. Mitto celeberrimum TERTULLIANI locum (n) et can. XVII. Concilii Laodicensi I. Constantino imperante habiti : haec enim nihil ad rem, fatente vel IAC. GRETSERO (o). Sed

E

vix

vix mihi tempero quin adscribam egregium locum pervetusti scriptoris, quem sub nomine EVSEBII Gallicani Episcopi vulgavit ANDREAS SCHOTTVS . Non male alii ipsum putant EVCHERIVM Lugdunensem, argumentum deducentes ex testimonio CLAVDII MAMERCI (p). Addam aliud indicium: HOMILIAM quippe, unde mox paucula desumemus, manifeste citat Scholiastes antiquus SINDONII APOLLINARIS (q) sub nomine EVCHERII. Recusam videbis in Bibl. PP. (r), atque ibi post alia. *Exoraturi sumus ut Dominus infirmitatibus, plagis, tribulationibus interdicat; malum pestilentiae, hostilitates, grandines, siccitates repellat, caeli temperiem pro salute corporum, pro terrarum foecunditate componat: elementorum pacem cum temporum tranquillitate concedat, peccata dimittat, flagella submoveat.* Si EVCHERII Lugdunensis ista sunt, testimonium nanciscimur indubium veritatis; nam V, Saec. incunte floruit EVCHERIVS, ac certe Mamercus vixit antiquior. Itaque statuendum IV. etiam saeculo Litanias et Rogationes fuisse cele-

lebratas, et quidem a popularibus gregatim et licenter. IVSTINIANVS (s) deinde laicis interdixit *Litanias facere sine Episcopo aut Clericis*. Sed olim Litanias, teste EVCHERIO, celebrabant vicani simplicesque rustici ut Dominus grandines ac siccitates repelleret, terras foecundaret, seu ne divina munera vento et grandine sternerentur. Potuit ergo magnus CONSTANTINVS suffragia illa de Christianis rogationibus accipere tunc primum in Ecclesiae libertate nascentibus. VGVPIO plane suffragia explicat, *rogationes quas Sanctis fundimus*.

(a) L. 4. C. de *malesf.*

(b) Nov. LXV.

(c) Lib. LX, tit. 39.

(d) L. cit. §. 489. et 635.

(e) Ad l. in C. Th.

(f) *Apolog.*

(g) *Pro Cluent. cap. IX.*

(h) *Ado Viennens. in Chron.*

(i) Lib. V. *Epist.* 14.

(k) *Epist. LXIII. ad Neocaesar.*

(l) L. 3. C. de *haeret. quae est.* 30. C. *Theod. eod. tit.*

(m) AVCTOR *Serm. CLXXIII. de temp. inter opera*

B. AVG.

- (n) *Ad Vxor. lib. II. cap. 4.*
- (o) *De Processionib. lib. 1. cap. 2. p. XII.*
- (p) *De Statu Animae lib. II. cap. 9.*
- (q) *Ad d. lib. V. Epist. 14.*
- (r) *Tom. VI. col. 645.*
- (s) *Nov. CXXIII. cap. 32.*

§. X.

At CONSTANTIVS et IVLIANVS Caesar severissimam Constitutionem protulerunt in Maleficos . Ita edicunt (a) .

Multi magicis actibus usi , elementa turbare , vitam insontium labefactare non dubitant , et Manibus accitis audent ventilare ut quisque suos conficiat malis artibus inimicos . Hos , quoniam naturae peregrini sunt , feralis pestis absumat .

In Codice Theodosiano Constitutio ista V. est eod. tit. , et lectio in omnibus congruit excepto primo commate , ubi habetur , *Multi magicis artibus quasi elementa turbare* etc. Quamvis IAC. GOTHOFREDVS hanc lectionem praeferat ; ego tamen retineo lectionem Iustinianeam . Maleficos enim labefactare vitam insontium credebant , atque elementa turbare , absque eo quod res utraque coniungeretur ;

nam

nam et elementa turbare alio poterant fine ;
et vitam labefactare veneficiis .

Quaedam ex prima Constitutionis parte
decerpsit B. AVGVSTINVS (b) . *Magi sunt qui
vulgo malefici ob facinorum magnitudinem nun-
cupantur . Hi , permissu Dei , elementa concu-
tiunt , turbant mentes hominum minus confi-
dentium in Deo , ac sine ullo veneni haustu ,
violentia tantum carminis interimunt . Unde LV-
CANVS lib. VI.*

Mens hausti nulla sanie polluta veneni

Incantata perit .

*Daemonibus enim accitis audent ventilare ut qui-
sque suos perimat malis artibus inimicos . Illa
AVGVSTINI (minus confidentium in Deo) glosse-
ma videntur a sciolis intrusum . Immo ne
quidem sancti Patris mentem adsequuti sunt.
Dixerat AVGVSTINVS, turbant mentes hominum
scil. concutiunt , in furqrem agunt . Scioli
opinati sunt haec pertinere ad consultores
maleficorum , quorum mentes turbarentur ,
et magicis artibus in transversum abirent .
ideo adiecerunt , hominum minus confidentium*

in Deo, ut vergeret sermo ad homines in Deo minus confidentes et daemonis opem implorantes. Quid plura? ISIDORVS (c) ad verbum, tacito AVGVSTINI nomine, locum integrum describit, neque agnoscit glossema. Item IO. SARISBERIENSIS (f) eadem sua facit, paucis immutatis, et emblema reiicit. *Magi sunt, et ob magnitudinem maleficiorum sic adpellantur, qui Domino permittente elementa concutiunt, rebus adimunt species suas, ventura plerumque praenunciant, turbant mentes hominum, immittunt somnia, hominesque violentia criminis dumtaxat occidunt, quod et LVCANVM nostrum non latuit. Ait enim. Mens hausti etc.*

Procul dubio B. AVGVSTINVS verba CONSTANTII exscripsit: nam propositum est E-dictum hoc nostrum an. 357. scil. CONSTANTIO IX. ET IVLIANO Caes. Coss. Atqui tunc temporis B. AVGVSTINVS bimus in cuna vagiebat. ISIDORVS deinde ac SARISBERIENSIS mira concordia B. AVGVSTINI vestigia preserunt.

(a) L. 6. C. de malef. et mathem.

(b)

(b) *De Civit. Dei* lib. XXI. cap. 6. . Refertur quoque
in can. 14. §. 1. caus. 26. qu. 5.

(c) *Orig. lib.* VIII. cap. 9.

(d) *Polycrat. lib.* I. cap. XI.

§. XI.

Venio ad interpretationem . *Audent ven-
tilare ut quisque suos conficiat . . . ini-
micos* . Ventilandi vocabulum , obscurum qui-
dem hoc loco , ego ita interpretor , ma-
gos *ventilare* h. e. prodere , palam facere ,
atque in vulgum spargere ritus illos et obser-
vationes quibus inimicorum vita labefacte-
tur . Sic plane *ventilandi* verbum adhibet A-
PVIEIVS (a) . *Qui nomen tuum pro tribunalibus
ventilavit* . Item MINVPIVS FELIX (b) . *Nec
intelligebamus ab his fabulas istas semper ven-
tilari* . Addendus PAPIAS non ineptus Gram-
maticus . VENTILAT , *spargit* . Schedae MSS.
Saec. XII. MARCHESINO auctore , quibus in
praesens utor . VENTILO . *as. i. quasi ad ven-
tum dispergo* . Malefici *ventilabant* , nempe do-
cebant VT quisque posset inimicos perdere
i. e. artes perdendi . IAG. GOTHOFREDVS mi-

ris modis *ventilandi* vocabulum ventilat . Ait
 I. significare posse magica ludibria et prae-
 stigias , desumpto vocabulo a gladiatoria
 ventilatione : II. susurros et stridores magi-
 cos labiorumque ventilationes : III. ventila-
 tiones mortuorum in linteo : IV. taedarum
 iactum aversis manibus : V. purgationem aë-
 riam : VI. agitationem corporis quoquo ver-
 sum in sacris usurpatam iudaicis : VII. deni-
 que *ventilare* explicat *agitare*, *impellere*, *com-
 movere*, *id est periculo obiectare insontium vi-
 tas* . Subscribit GOTHOFREDO re tamen haud
 mature perpensa et cursim indicata eruditis-
 simus CANGIVS (c) . Ego autem fateor sum-
 mam GOTHOFFEDI philologiam studiosorum
 oculos praestringere , legem illustrare diffi-
 teor .

(a) *In Apolog.*

(b) *Octav. cap. XXVII. sect. 2.*

(c) *Glossar. h. v. tom. VI. p. 1478.*

§. XII.

Superest *pestis illa feralis* , quae tot pepe-
 rit interpretibus tricas , Olim emendabam

RE-

RESTIS feralis absumat : atque ita laqueum minarentur Principes , quem *APVLEIVS* (a) non dissimili loquutione *funestum nodum* vocaverat . Immo *feralia* proprie dicuntur instrumenta mortis in supplicio noxiorum . Sic *feralia crucis ligna* reperies apud *MINVTIVM* (b) .

Neve regeras restem sive laqueum non *absumere* , sed flammam tantum ex consueta *ICTorum* phrasi (c) Nam et gladio damnatos *consumi* scribunt *VLPIANVS* (d) ac *PAVLLVS* (e) Accedit *MARCELLINVS* (f) . *Romulus et Sabostius Curiales poenali consumpti sunt ferro* : et alibi (g) *Abscissa cervice consumptus est ferro* .

Multo minus obiici poterit laquei supplicium veteribus fuisse ignotum . Nam *reste* guttur frangebant noxiis (h) et haec , ni fallor *laquei poena* dicitur *PLINIO* (i) . Neque inficior illam privatim et in carcere inflictam , publice numquam . At postea sub Augustis cum tot artes crudeliter necandi inventae sunt , quis negaverit et laqueum non
raro

raro adhibitum? VLPIANVS certe (k) ait cum damnatur aliquis ut *gladio* pereat, gladium omnino usurpandum, non *laqueum* vel securim: unde colligas aevo ICTi suspendiosos non fuisse rarioris exempli, saltem ex licentia Iudicum. Idem VLPIANVS (l). *Non solent autem lugeri, ut Neratius ait, hostes vel perduellionis damnati, nec suspendiosi, nec qui manus sibi intulerunt.* Suspendiosos distinguit ab his qui sibi manus inferunt, nec satis commodum cum PETRO FABRO (m) de cruciariis loquutum dixeris VLPIANVM.

Denique postquam CONSTANTINVS Magnus (n) edixit neminem in crucem tollendum, *furca* eius loco successit, non quidem significatione sua veteri, sed novitia, et quam nostra adhuc aetate servat. Propterea TRIBONIANVS totis Pandectis ubi *crucem* reperit, *furcam* suffecit, (o) ac praesertim in fragmento VLPIANI (p) ubi loquutionem deprehendas in *furca* suspendisse. Nec leve praebet argumentum protritum AVSONII locus. (q)

Miselle doctor & tibi sit obscaeno

Tuumque nomen Θ sectilis signet.

Opti-

Optime IOS. SCALIGER (r) animadvertit laqueum primo senario per nexum & designari, damnationem altero; nam O litteram sententiis capitalibus praefigebant, ut vulgo notum, quae de re O eleganter *mortiferum signum Praetoris* adpellatur MARTIALI (s). Itaque AVSONII tempore Iudices ad suspendium plerosque damnabant; neque enim doctori Euno condemnationem istiusmodi imprecatus esset Poeta, nisi fuisset in usu. Denique ISIDORVS (t) satis luculenter hodiernum patibulum describit. *Patibulum vulgo furca dicitur quasi ferens caput (u). Suspendum enim et strangulatum haec exanimat Patibulum in quo homines appensi cruciuntur vel patiuntur. . . . Patibulum appensos statim exanimat.* Temporibus ergo VLPIANI, AVSONII, TRIBONIANI, atque ISIDORI restem feralem in supplicio etiam publico non plane incognitam suspicor, ut potuerint CONSTANTIVS Aug. et IVLIANVS Caes. sublata iam pridem crucis poena, laqueum sive restem maleficis decernere.

Non hinc abibo, nisi pauca disseram de
pae-

paene desperato AMMIANI loco (x) . Is de Maximino Praefecto Urbi bellua potius quam homine haec tradit . *Resticulum de fenestra praetorii quadam remota dicitur semper habuisse suspensam , cuius summitas quindam velut TAMVSAM colligaret , nullis quidem indicibus fultam , sed nocituram insontibus multis* . MATTHIAS MARTINIVS (y) hoc loco exscripto superdicit, *Quaerendum*. Pariter Maurini (z) viri doctissimi, TAMVSA nominata, pronunciant, *Divinet qui potest*. MARGELLVS DONATVS explicabat *cruoris substantiam ex εἶσα et tames* . At in Glossis Isidorianis a DONATO consultis *tames* perperam legitur monente GRAEVIO pro *tabes* . Eruditissimus GRONOVIVS (aa) pro TAMVSA mallet EMPVSAM . Legerem ipse TOMVSAM vel potius TOMICEM . Graecis θώρυξ est *laqueus, funiculus* . Hinc fluit Latinis TOMEX dempta adspiratione in scriptura veterum (bb). Proprie significat laqueum sparteum arctissimo quodam volumine innexum ad constringendos manipulos et fasces agrestium . Maximinus funem ex fenestra demiserat , in cuius apice

nodum collegerat ad tomicis formam , atque
 ita strangulandis civibus ferale paraverat in-
 strumentum . Iam si ita recte AMMIANVS in-
 telligitur , huc puto respexit PETRVS FABER
 dum scripsit in scheda a FABROTO evulgata (cc):
Vera falsariorum poena et legitima, circa humi-
liores quidem servis cruciariis comparatos, fuit
furca sive laqueus ; et videatur in hanc rem
 AMMIANVS MARCELLINVS, quem in hoc ci-
 tatum a Berterio relatore memini , ac dein a
 Protopraeside Durantio in arrestis publice pro-
 nunciatis sub festum Magdalenes an. 1586.
 Quod de suspensio Vigentio falsario traditur in
 Constitutione Imperatoris relata ab Augustino
 epist. 68. nomine Clericorum Hipponensium ,
 hoc ad suspensionem ab ordine Decurionum per-
 tinet , non ad laqueum , ut apparet ex eo quod
 subiicitur „ Eundem ipsum Vigentium sub ido-
 nea prosecutione ad comitatum meum mittas
 „ Sed omnino de quaestione Vigentii Con-
 stitutio intelligenda . Sic MARCELLINVS (Id).
 Suspensus Eusebius . . . , se conscio hanc dixe-
 rat concitata ; et mox (cc) de quodam Valvo-
 me,

mere . *Ut seditiosorum, antesignanum . . . post terga manibus vinctis suspendi praecepit.* Postea Valvomeres ad Picenum eiectus et supplicio capitali alia de causa interemptus narratur . Sed non nisi de laqueo commode explicaveris illa eiusdem MARCELLINI (ff). *Aginatius . . . cum magnis clamoribus appellaret nomina Principum sublimis raptus occiditur.* Itaque aut hunc postremum , aut primum ex AMMIANO locum cogitabant BERTERIVS , DURANTIVS , et FABER .

(a) *Metam. lib. VIII. p. 143.*

(b) *Offav. cap. IX. sect. 5.*

(c) *Conf. l. 1. ff. de cadav. punis. iunct. L. 3. ff. de poen.*

(d) *Apud Collat. LL. Mosaic. et Rom. tit. XI. §. 7.*

(e) *l. 3. ff. de poen. et Sentent. lib. V. tit. 17. §. 3.*

(f) *Lib. XXI. p. 353.*

(g) *Lib. XXVI. p. 567.*

(h) *CIC. in Vatini. cap. XI. TACIT. Annal. lib. V. cap. 9. SVET. in Tib. cap. LXI. VAL. MAX. lib. V. cap. 4. §. 7.*

(i) *H. N. lib. II. cap. 63.*

(k) *L. 8. §. 1. ff. de poen.*

(l) *L. 11. §. 3. ff. de his qui not. inf.*

(m)

(m) *Semestr. lib. II. cap. 9.*

(n) NICEPH. *lib. VII. cap. 46.* HERM. SOZOM. *lib. I. cap. 8.* AVREL. VICTOR *in Vita Idem innuit AUGUSTI-
NVS serm. XIV. de Verb. Dom., conc. 2. in Psalm. XXXVI.,
et ad cap. XVIII. Matthaei.*

(o) CUIAC. *Obs. lib. XVI. cap. 1. et ad PAVLL. Sent.
lib. V. tit. 14.* CONTIVS *Var. cap. 13.* RAEVARD. *Com-
pct. lib. I. cap. 16.* LIPS. *de Cruce lib. III. cap. 7.* WIS-
SENBRACH. *Embl. Trib. cap. VII. §. 15.*

(p) *L. 6. princ. ff. ad l. Iul. pecul.*

(q) *Epigr. CXX. v. 12.*

(r) *Leet. Auson. lib. II. cap. 20.*

(s) *Lib. VII. Epigr. 35.*

(t) *Orig. lib. V. cap. 27.*

(u) *Melius legeres „ furans caput „*

(x) *Lib. XXVIII. p. 653.*

(y) *Lex. Philolog. tom. 2. p. 734.*

(z) *Ad CANGIVM h. v. col. 988. t. VI.*

(aa) *In nos. ad MARCELLIN. p. 562.*

(bb) *Voss. etym. h. v.*

(cc) *Ad CUIAC. Paratitl. Cod. lib. IX. tit. 28.*

(dd) *Lib. XIV. p. 75.*

(ee) *Lib. XV. p. 85.*

(ff) *Lib. XXVIII. p. 659.*

§. XIII.

Nunc de Constitutione redintegrandus ser-
mo. Emendatio hucusque adserta, ne verum
dis-

dissimulem, non ita me afficit ut lectionem vulgatam lubenter derelinquam. Viri docti in binas descivere sententias de *peste ferali*, quas oportet accuratius expendere ad ferendum recte iudicium.

Veteres Graeci Latinique (a) *feralem pestem* exponunt bestias. IAC. CUIACIUS (b) etiam addit emendationem de suo, refingens *pestem* in *pastum*; sed necessaria non videtur mutatio, ut infra evincam.

Huic explanationi mirum quantum fa-
veant illa *quoniam naturae peregrini sunt*, qua-
si dicat Imperator: *Tradantur bestiis laniandi,*
quoniam similes bestiis internecino odio in hu-
manum genus ferociunt.

Nec verba repugnant. FERALIS PESTIS AB-
SUMAT. *Feralis* ad *feras bestias* respicit. MAR-
TINVS quidem DEL RIO (c) obicit *feralem a*
fera derivari h. e. morte, proptereaue *fera-*
lem idem esse ac *funereum*, non *ferinum*: *fe-*
ralis primam syllabam produci, *ferini* primam
corripiri: atque insuper *feralem* nunquam hoc
sensu in auctoribus observari. Sed si a *fera* i.
e. mor-

è. morte *feralis* est, non repugnat a *fera bellua* idem verbum alia significatione descendere. *Feralis* prima syllaba non semper producitur, PRVDENTIVS (d) certe corripuit

. . . *monstrumque ferale sequuntur* :

et si minus, in metro accuratum PRVDENTIVM opponas, saltem cum GELLIO (e) fateberis hoc in negotio nos a metri legibus pluries falli. Denique etsi concedamus adductam *feralis* significationem a scriptis veterum exulare, concedi velim Constantii temporibus latinam linguam laborasse foedissimis naevis. Accedit quod CONSTANTINVS (f) et IVSTINIANVS (g), malam in culleo mansionem parricidarum *ferales angustias* adpellant, quod *feris bestiis* in desperatum consortium traderentur. Sed et AMMIANVS (h). *Nullas infestas hominibus bestias, ut sunt sibi ferales plerique Christianorum, expertum*. *Ferales* dicit qui ferarum bestiarum saevum profitentur ingenium. FVLGENTIVS quoque (i) *feraliter* usurpat a *ferali* deductum adverbium, ut *ferinum* exprimat impetum. Dum

F

amior

amor noviter venit, ut leo feraliter invadit. Pro-
pius ad rem nostram ISIDORVS. (k) De ferali
certamine. Feralium pugna erat missas bestias
excipere iuvenes, et pugnare adversus eas ultro-
neo funere.

PESTIS (ne Cuiacianam crisin arripas)
 quidvis dicitur mortem creans et exitium.
 Sic belluae pestes optime dicuntur. SENECA
 Tragicus (l)

Pestes vocat, quascumque ferventis creat
Arena Libyae, quasque perpetua nive
Taurus coetret frigore Arctoo figens,
Et omne monstrum.

ABSUMAT. Appositè satis in pa stu ferarum.
 Adiungam locum pulcherrimum ex Epistola
 sincera B. IGNATII Martyris ad Romanos. Si-
 nite me ferarum escam fieri, per quas licebit
 Deum adipisci. Frumentum sum Dei, dentibus
 ferarum molat, ut mundus panis Dei inveniat.
 Immo blanditis demulcete potius feras, ut mi-
 hi sepulcrum fiant, ut nihil de corpore meo
 relinquunt, ne mortuus molestus cuquam inveni-
 at. Tunc ero verus IESU CHRISTI discipu-
 lus.

*lus cum mundus nec corpus meum viderit . De-
precemini Dominum pro me , ut per haec in-
strumenta Dei efficiar hostia .*

(a) *Scholiastae Basilic. lib. LX. tit. 39. PHOTIVS No-
moean. tit. IX. cap. 25. BALSAMO ib. OLOFREDVS Be-
nevent. et ACCURSIVS in gl. ad h. l.*

(b) *Not. ad h. l.*

(c) *Disq. Magic. in append. lib. V. p. 113.*

(d) *Psychomach. v. 565.*

(e) *Noël. lib. XII. cap. 3.*

(f) *L. un. C. de his qui parent. vel lib. occid.*

(g) *§. 7. Inst. de publ. iudic.*

(h) *Lib. XXII. p. 378.*

(i) *Mythol. lib. II. cap. 1.*

(k) *Orig. lib. XVIII. cap. 58.*

(l) *Med. v. 681.*

§. XIV.

Nunc aliam sententiam de *ferali peste* pro-
ponam . IAC. RAEVARDVS (a) PETRVS FA-
BER (b), et suppresso utriusque nomine DION.
GOTHOFREDVS (c) in alia discedunt . *Pestem*
explicant interitum , et *feralem* dici putant ,
quod malefici flammis absumerentur , ut in
feralibus officiis cadavera . *Pestem accipi pro*
morte exitioque certissimo adnotat IAC. GO-

THOFREDVS (j) ex TITINIO , CLAVDIANO ,
MANILIO . Immo addere debuit *pestem* pro-
prie *mortem* significare puris auctoribus . HVB.
GIPHANIVS (e) *Pestis*: exitium . Qui hac voce
pro morbo quem veteres constanter *pestilentiam*
vocant utuntur , barbarissant . Ac licet GIPHA-
NIO obsistant IO. FABER (f) et MATH. MAR-
TINIVS (g) , nihilominus praeoccupavit isto-
rum argumenta et profligavit POPMA (h) .

Adlata equidem interpretatio priore non
minus probabilis mihi videtur .

Malefici enim , ceterique huius fursuris
impostores vivicomburio solebant absumi (i) ,
quomodo et sacrilegi (k) . Attamen vivicom-
burii notio in voce *feralis* non subest , quod
RAEVARDVS et alii suspicantur , sed , nisi fal-
lor , per vocabulum *pestis* luculenter expri-
mitur . *Pestis* enim nescio quam com flam-
mis habet cognationem . Auctor Vocab. Vet.
Dicitur pestis a pascendo , quod veluti incendium
depascit , dum descendit in totum corpus . Non
quaerimus de veriloquio , hoc enim acute in-
vestigavit MVRETVS (l) . At constat a *peste*
ad

ad flammās non magnum discrimen intercedere tum quod ignis ipse praesens contineat exitium, tum quod pestilitatis more grassetur. Hinc VIRGILIUS (m) *pestem* accurate posuit pro *incendio*, ubi de Regina canit,

pesti devota futurae.

Quid hic *pestis* nisi vivicomburium? Didus? Idem divinus Poeta de navibus agens incendio consumptis bis terque utitur *pestis* vocabulo (n). Neve regeras poeticam esse loquutionem, audi APVLEIUM (o). Cum ille in asinum versus stupae manipulos dorso portaret, adnoto his repente igne et excitato incendio parum abfuit miser quin vivicomburio extingueretur. Verba sunt. *Tantum me funestus ardor invaserat, nec ullum pestis extremae suffugium, nec salutis aliquod adparebat solatium.* Adfirmarem CONSTANTII *pestem feralem* ipsissimam esse *pestem extremam* APVLEII. Atque hanc interpretationem ita amplector, ut non reprehendam si qui de ludo arenario cogitabunt.

(a) *Vm. lib. v. cap. 3.*

(b)

(b) *Somn. lib. II. cap. 7.*

(c) *Ad h. l.*

(d) *Ad h. l. in C. Th. lib. IX. tit. 16. l. 5.*

(e) *Ad LUCRET. lib. 3.*

(f) *Thes. erudit. edit. CELIAR. h. v.*

(g) *Lex. Philol. h. v.*

(h) *De Visu Ant. loquut. h. v.*

(i) *PAULVS Sent. lib. V. tit. 23. §. 11. DIOCLE-
TIAN. lib. VII. tit. de malef. et math. in Cod. Gregor.
CONSTANTINVS l. 3. C. de malef. quae est 1. C. Th.
h. l.*

(k) *VLP. l. 6. princ. ff. ad L. lul. pecul.*

(l) *Is ad CATVLL. pestem derivat παρὰ τὸ πικρὸν.
Iuvat coniecturam MVRETI quod olim VERESTAS diceba-
tur. FESTVS h. v. p. CLXI.*

(m) *Aen. lib. I. v. 715.*

(n) *Aen. lib. V. v. 699. et 683. lib. IX. v. 540.*

(o) *Metam. lib. VII. p. 119.*

EXPLICIT.

VA1 1523484